

高等小學校秋季始業

1914

日本
第四冊

第二學年
第二學期

教員用

定價大洋一元

海圖彙編

索書號碼

登記號碼 477334

本書係推勘比較而後
見其原本係日本實作
新穎而措辭極有
生動第九論動物之
分

目次

- 第一 清人入關
- 第二 鄭成功
- 第三 清聖祖
- 第四 中俄界約
- 第五 喀爾喀
- 第六 年羹堯
- 第七 清高宗
- 第八 準噶爾
- 第九 白蓮教天理教
- 第十 鴉片之戰
- 第十一 英法聯軍之役
- 第十二 太平天國
- 第十三 新疆之役

授課時數

- 二
- 二
- 二
- 二
- 二
- 二
- 二
- 二
- 二
- 二
- 一
- 二
- 一

- | | | |
|-----|--------|---|
| 第十四 | 中法之戰 | 二 |
| 第十五 | 中日之戰 | 二 |
| 第十六 | 義和團 | 一 |
| 第十七 | 日俄遼東之戰 | 一 |
| 第十八 | 預備立憲 | 二 |
| 第十九 | 清帝退位 | 二 |
| 第二十 | 民國統一 | 二 |

時間分配方法附

每篇教授二時者，其分配方法，可分三種：(甲)每篇平分二段，每時教授一段；(乙)每篇分二段，第一段較多，第二段較少，第一時教授第一段，第二時教授第二段，并復習全篇；(丙)不分段落，第一時教授，第二時復習，其每篇教授三時以上者，以此類推。(如三時者可分二三段，四時者可分三四段，或竟不分段落，視各篇內容而定。)

共和國教科書 新歷史教授法第四冊

第一課 清人入關

本文 明思宗之末年，清世祖初立，年幼，其叔多爾袞攝政，以明室多難，有併吞中原之志，會北京為李自成所陷，山海關守將吳三桂欲降自成，聞其妾為自成所奪，大憤，遂引清兵入關，遂自成，迎清世祖於北京。時民國紀元前二百六十八年也。史可法督師江北，聞思宗殉國，與羣臣立福王於南京，致書於清攝政，勸其勿利明室土地，願以金帛為報，然福王耽於逸樂，置國事不卹，奸臣弄權，諸鎮將驕悍不聽命，清人以兵南下，可法守揚州，城陷被殺，清兵遂屠揚州，渡江陷南京，明臣爭先迎降福王，出奔被執北去。



史可法像

準備

一 寫史可法像四字於黑板，因指書中圖示之曰：此像乃史公之遺像也，冠烏

紗帽、服一品服、胸繡仙鶴、腰圍玉帶、我國先民之以身殉國者也、吾曹對於此像、當肅然起敬仰之心焉、

二 問國家置鎮設將、將以何爲、答將以衛國、將何以必聽政府之號令、答以謀統一、然則不聽政府號令之將、卽爲全國之公敵、卽爲亡國之虎俚、謂予不信、盡觀明末之諸鎮將、

教授事項

(甲) 時間分配 本課分二時、

第一時 明思宗之末年至時民國紀元前二百六十八年也

第二時 史可法督師江北至被執北去

(乙) 內容提示

- 一 於吳三桂之以愛妾故、不愛國家、見其全無心肝、宜爲千秋所唾罵、
- 二 於史可法之以愛國家故、不惜生命以支大難、見其志氣與日月爭光、宜爲千秋所欽仰、
- 三 當明室將亡之時、君臣上下、不知憂慮國事、或耽樂、或弄權、或驕悍自恣、卒

至國亡而此輩亦與之俱盡、可爲後世之戒、

參考

〔清世祖〕名福臨、太宗子、卽位時年六歲、在位十八年、都計清自世祖入主中國、傳九帝二百六十八年、

〔多爾袞攝政〕多爾袞、太祖子、太宗同母弟、封睿親王、世祖立、與鄭親王濟爾哈朗同輔政、已而獨攬大權、

〔吳三桂〕高郵(今江蘇高郵縣)人、官遼東總兵、守寧遠有功、明封三桂平西伯、未幾、棄寧遠、鎮山海關、(今直隸臨榆縣東一稱榆關)

〔三桂欲降自成〕三桂父襄提督京營、京城陷、襄爲自成所脅、令以書招三桂、時三桂方統兵入援、進次灤州、(今直隸灤州)而襄所遣家人適至、乃卽召入、以其父已降賊、遂有降意、

〔三桂妾爲自成所奪〕三桂妾陳圓圓、原爲明嘉定伯周奎歌妓、三桂悅之、以千金購之、會邊警過行、不及偕、奎乃送圓圓於襄所、京城既陷、圓圓爲賊將劉宗敏掠去、獻之自成、

〔三桂大憤〕三桂問家人，聞其父及母妻被囚，均默然。及聞圓圓屬自成，乃拔劍拂衣而起，擊案切齒奮誓曰：「吾不誓殺此賊，以還我圓圓者，非丈夫也。」遂作書絕其父，馳歸山海關。

〔三桂引清兵入關〕三桂遣將赴滿洲乞師，遣多爾袞書，多爾袞方以大將軍督師，略地關外，比得三桂書，乃遣兵齎紅衣礮往山海關進發。

〔逐自成〕自成聞三桂不降，親部衆十餘萬，東攻山海關，以別將從一片石（關名在今直隸撫寧縣東北）。越關外，謀夾擊三桂，引清兵急進，敗賊將於一片石，清令三桂先驅，戰良久，清以鐵騎衝賊中堅，賊衆大潰，死者無算，自成還京師，殺三桂家屬，載輜重西遁，而留陳圓圓於京，以緩三桂師。

〔迎清世祖於北京〕多爾袞既入北京，奏捷瀋陽，迎世祖由瀋陽至北京，因定都焉。

〔民國紀元前二百六十八年〕即明思宗崇禎十七年，清世祖順治元年。

〔史可法〕祥符（今河南省治）人，思宗時官至南京兵部尚書，參贊機務。

〔督師江北〕思宗殉國，報至南京，可法誓師勤王，渡江抵浦口（今江蘇江浦縣）。

東北

〔與羣臣立福王於南京〕福王名由崧，神宗之孫，思宗之從兄也。其父福王常洵封洛陽，李自成陷洛陽，殺常洵，由崧嗣爲王。北京既陷，福王在淮安（今江蘇山陽縣）。南都議立君，張愼言呂大器、姜曰廣等，均以福王雖倫序當立，而貪淫失德，有七不可立，移牒可法。可法還南京，亦以爲然，而馬士英等利福王昏庸，欲立之，士英方握重兵，可法不得已，迎福王監國，旋即帝位，是爲弘光帝，在位一年。

〔致書清攝政〕多爾袞致書史可法，欲以爵土，可法覆書拒之，其大意如本文所云。

〔福王耽於逸樂〕福王昏淫，嘗除夕在興寧宮，忽忽不樂，太監韓贊周言新宮宜歡，福王曰：「梨園殊少佳者。」贊周泣曰：「臣以陛下遇令節，或思皇考，或思先帝，乃作此想耶？」

〔奸臣弄權〕福王用馬士英、阮大鍼等，皆奸險小人，引用奸黨，擠排善類。

〔諸鎮將驕悍不聽命〕福王分淮揚鳳廬爲四鎮，以黃得功、劉良佐、劉澤清、高傑

領之得功澤清傑，爭欲駐揚州。傑先至，爲揚民所拒，傑攻城頗急，知府馬鳴騷堅守月餘，傑知不可攻，意稍息，而澤清亦大掠淮上，臨淮（今安徽鳳陽縣東北）不納良佐軍，亦被攻，福王命史可法往解，雖部署略定，然其後可法守揚州，檄各鎮兵，乃無一至者。

〔清兵南下〕清以豫親王多鐸爲定國大將軍，帥師下江南。

〔可法殉國〕可法聞盱眙（今安徽盱眙縣）已爲清所下，馳入揚州，清兵踵至，可法督諸文武分陴拒守，舊城西門險要，可法自守之，未幾清兵薄城下，礮擊城西北隅，城遂破，可法自刎不殊，被執，可法大呼曰：我史督師也，遂見殺。

〔清兵屠揚州〕屠凡十日，有揚州十日記一書，紀其事，計焚尸之數，共八十餘萬，其落井投河閉門焚縊者不與焉，被擄者不與焉。

〔陷南京〕清兵既陷揚州，旋渡江，破南京。

〔明臣迎降〕清軍營南京城北，總督京營趙之龍奉表納款，勳戚大臣及文武官員均迎降。

〔福王出奔被執北去〕福王於清兵渡江時，荒宴至夜半，跨馬自通濟門出走，遂

奔太平（今安徽當塗縣）已而清兵陷蕪湖（今安徽蕪湖縣）明總兵田雄挾福王降清，清兵遂執之北行。

第二 鄭成功

本文

福王既被虜，明人立唐王於福州，清兵陷福州，殺唐王，明人又立桂王於

肇慶，

在廣東

有兩廣雲貴四川及江西湖南

之地，時鄭成功據廈門，

在福建

桂王封爲延

平王，成功性忠勇，縱橫海上，極力與清人

爲敵，北方及江南之地，皆爲清所據，下

令剃髮結辮，抗令者殺之，義兵因之蜂起，

不久皆平，桂王亦屢敗，各地盡失，逃於緬

甸，緬人獻於吳三桂軍前，滿洲兵士有欲

奉桂王爲主者，事覺，皆被殺，桂王亦死之，

方清兵之進攻桂王也，鄭成功乘虛，

率舟師直薄南京，謁明太祖陵，沿江一時響應，東南大震，終以無援敗還，後遂攻臺灣，逐荷蘭而有其地，建立政府，傳子及孫，爲清聖祖所滅。



鄭成功像

準備

- 一 寫鄭成功像四字於黑板，指書中圖示之曰：此臺灣延平王祠中之石像也，方面大耳，美鬚眉，稗史所稱為丰采掩映，奕奕耀人者也。為明季愛國大英雄，足與史可法同傳不朽，吾曹當肅然敬之。
- 二 專制時代，強奪人之土地而為之君主，其慘酷無狀，不獨中國為然，而中國所受者為特甚。今為汝曹述明末人民所蒙之慘禍。
- 三 凡一國之建立，必恃全體國民為基礎，若民國不自振作，雖有一二傑出之豪傑，卒無補於滅亡。今為汝曹述鄭成功敗退之歷史。

教授事項

(甲)時間分配 本課分二時

第一時 福王既被虜，至桂王亦死之

第二時 方清兵之進攻桂王也，至為清聖祖所滅

(乙)內容提示

一 於鄭成功當學其忠勇，苟全國國民皆有鄭成功之志氣，自能立國家萬年

之基

- 二 於吳三桂之力鋤明裔，見其不獨為明之罪人，實為人道之賊。
- 三 於鄭成功之逐去荷人，建立政府，見吾國人具有立國之能力，具有與世界列強競爭之能力。

參考

〔唐王〕名聿鍵，太祖八世孫，福王為清虜，聿鍵入福州，（今福建省治）明禮部尚書黃道周等擁立之，是為隆武帝，在位二年。

〔清殺唐王〕唐王立未幾，即輾轉遷徙，至汀州，清兵奄至，從官奔散，唐王被執，械至福州，斬於市。

〔桂王〕名由榔，神宗之孫，福州既陷，明兵部尚書丁魁楚、兵部侍郎瞿式耜等擁立之，即帝位於肇慶，（今廣東高要縣）是為永曆帝，在位十六年。

〔桂王領有地域〕桂王既立，輾轉遷徙，至桂州，金聲桓以江西內附，李成棟以廣東反正，李占春等又起兵分守川南川東，於是雲南貴州廣東廣西江西湖南四川七省之地，皆為明有。

〔鄭成功〕原名森，南安（今福建南安縣）人，母爲日本女，以年少材武，得幸唐王，賜姓名朱成功，封忠孝伯，世通稱爲鄭成功。

〔據廈門〕廈門，即今福建之思明縣，成功父芝龍，唐王原封爲平國公，令其出兵，應敵，芝龍不用命，通款於清，成功痛哭而諫，芝龍不從，單騎北去，未幾清兵至，芝龍家屬被淫掠，成功母自縊死，成功大會文武羣臣，定盟恢復，設演武場於廈門。

〔桂王封成功延平王〕成功於永曆二年，始知桂王在肇慶，遣光祿寺卿陳士京入朝，士京還自行在，封成功爲延平（今福建延平府）王。

〔成功與清人爲敵〕成功之走廈門也，屢出沒閩海，謀恢復清以芝龍書招之，不可，發兵福州興化（今福建興化府）間，轉略溫台（今浙江永嘉等九縣及臨海等六縣），既拜延平王，益治兵謀大舉，戈船之士十七萬，以五萬習水戰，五萬習騎射，五萬習步擊，以萬人來往策應，萬人披鐵甲，綰以金碧彪文，當前鋒，金火不能入，縱橫海上。

〔清剃髮令〕薙髮垂辮，在漢時本西南夷之俗，後乃延及於女真，清代因之，初入

北京時，曾下令薙髮，嗣以民人抵抗，聽民自便，迨南方漸定，乃嚴令盡薙，不薙者殺無赦，又令人鳴鑼，擗牌示市曰：留頭弗留髮，留髮弗留頭。

〔義兵因之蜂起〕清之陷江南也，薙髮令下，江陰（今江蘇江陰縣）諸義士，倡言保髮以全漢種，請闔典史應元入城主守，凡守八十日城陷，全城被屠，其他若陳子龍等起松江（今江蘇華亭縣），吳易等起吳江（今江蘇吳江縣），盧象觀等起宜興（今江蘇宜興縣），又如崇明（今江蘇崇明縣），崑山（今江蘇崑山縣），嘉定（今江蘇嘉定縣），嘉興（今浙江嘉禾縣），徽州（今安徽歙縣）等處，亦各起兵謀恢復，然皆不久即見滅。

〔桂王屢敗〕先是桂王軍在江西湖南者，以次俱敗，清兵乘勝入粵，桂王奔梧州（今廣西梧州府），桂林（今廣西桂林府）陷，奔南寧（今廣西南寧府），廣西諸府以次陷，奔廣南（今雲南廣南府），輾轉至永昌（今雲南永昌府），清兵由貴州入雲南，奔騰越（今雲南騰越州），復由騰越出走，抵囊木河（在今緬甸北境），是爲緬甸界，於是桂王之領土全沒。

〔緬人獻桂王於吳三桂軍前〕桂王既入緬，緬人以舟迎王，浮伊拉瓦底河南行，

居於赭磴，與緬都阿瓦隔水相望，明將李定國、白文選會兵攻阿瓦，大敗緬兵，令出王、緬人不肯，緬酋以納王故，屢被兵，國人咸怨，其弟弑之而自立，使人殺王從官及左右，時吳三桂爲平西大將軍，必欲俘王以爲功，會清兵入緬，緬酋遣人至王所，連坐擁之去，並其眷屬送三桂軍前，白文選被執，李定國走死。

〔滿洲兵士謀立桂王〕吳三桂送由榔，在路以罪囚待之，人心無不嘆惋，由榔體貌修偉，然趾爪內卷，素不能騎，恃轎而行，今不可得，故其苦彌甚，有正藍旗章京厄兒特，見之深憤，常曰：「吳三桂原食渠家祿，何無毫髮恩？」乃爾，遂同滿將士邵爾岱等，割髮爲號，約共劫桂王爲主。

〔事覺被殺〕厄兒特謀奉桂王入漢中，爲其下所洩，厄兒特等遂見殺。

〔桂王死〕三桂請將桂王就滇處分，清令聽三桂處置，滿將愛星阿曰：「當如何？」三桂曰：「駢首。」愛星阿曰：「如此未免太慘。」三桂以清旨對，星阿以爲不可，乃免斬，縊王及其子於滇城（今雲南省治）篋子坡，王母大哭呼天曰：「吳三桂逆賊，汝立心謀反，而以我家爲汝固寵計，我張目地下，見汝之碎屍萬段也。」

〔鄭成功南京之役〕成功出師，由崇明入江，時沿江要害，清皆置重兵，設大礮，橫

鐵索阻守甚嚴，成功以十七舟徑進，蔽江而上，破瓜洲，略鎮江，大破清援師於楊蓬山（在今丹徒縣西），遂克鎮江，西上抵南京，而別將張煌言復率所部由蕪湖（今安徽蕪湖縣）取徽寧諸路，安徽列城望風納款者，凡四府三州二十四縣，清世祖方議親征，而成功已爲清將梁化鳳所敗，煌言亦敗於清兵，成功經營海外十餘年，進取之志，卒不得達，以餘艦歸廈門，煌言亦自錢塘江出海，〔成功立政府於臺灣〕臺灣故爲成功父芝龍所闢，成功敗還時，遇中國人爲通事於荷蘭船者，勸成功取臺灣，時臺灣方爲荷人所據，城壘極高厚，成功以海舶乘漲潮直抵城下，城中民陰爲內應，城遂下，成功遂於其地置政府。

〔傳子及孫〕成功在臺未幾卒，子經嗣，屢起兵謀恢復，未遂，所志亦卒，子克塽嗣。

〔清聖祖〕世祖子，名玄燁，在位六十一年。

〔臺灣鄭氏滅〕克塽幼弱，不任事，清遣施琅大破其軍於澎湖，遂入臺灣，克塽降清。

第三 清聖祖

本文

清聖祖者，世祖之子也，聰明有大略，冲齡踐位，太師龍拜專權，刑賞自己。

出帝佯不問，惟與幼童十餘輩，習相撲之戲，伺釐拜入內，令諸童執之，遂親政。時吳三桂封平西王，鎮雲南，擁大軍，勢力極盛，帝畏惡之，詔撤藩歸遼東。三桂遂起兵稱帝，南方各省及陝西甘肅皆應之，然卒爲帝所平。旋定臺灣，服外蒙古，海內始統一。帝於是增駐滿洲軍士於重要城邑，以資鎮懾，號曰駐防，巡遊塞外，江南，以周知地方情實，永免滋生人丁之賦。羅致文人學士，榮以利祿，以收人心，又優待天主教士，習其測算格致之術，故西方文化之輸入，帝亦有力焉。

準備

- 一 問國家何以有刑賞，答刑以懲惡，賞以勸善，若有人濫用威權，意所欲刑則行刑，意所欲賞則行賞，此人爲國家何如人，答爲國家姦人，然則爲汝曹言清初之姦人（因書釐拜二字於黑板）
- 二 問汝曹所讀之歷史，已至上古迄明末矣，中國大勢，利割據乎，利統一乎，答割據則亂，統一則治，然則爲汝曹言明後之統一中國者（因書清聖祖三字於黑板）
- 三 問汝曹同學若干人，非汝曹各箇人之友乎，答曰然，豈獨同學者爲汝友，即

非同學者亦汝友，若遇非同學者之學術高於汝曹，汝曹將吸收乎，抑拒絕乎，答曰吸收，國於世界，皆友邦也，吾爲汝曹言中國之吸收友邦學術者（因指黑板上清聖祖三字以示之）

教授事項

（甲）時間分配 本課分二時

第一時 清聖祖者至海內始統一

第二時 帝於是增駐滿洲軍士於重要城邑，至帝亦有力焉

（乙）內容提示

一 於釐拜專權之爲聖祖所執，見跋扈專擅者之不容於國家，專制時代，尙不容有跋扈專擅之人，則共和時代更可知

二 於三桂之既覆明室，又反清室，釀成無數之殺劫，見此類反覆無常之小人，直明清兩代之公敵

三 測算格致之術，聖祖吸收於天主教士，故本課言聖祖聰明，惟其聰明，故能吸收他國之聰明，以補己國聰明之不足，是爲真聰明

參考

〔清聖祖聰明〕聖祖玄暉，世祖第三子，六歲時與仲兄福全問安宮中，世祖各問其志，福全以願爲賢王對，玄暉云：「待長而效法皇父，黽勉盡力。」世祖遂屬意焉。

〔冲齡踐位〕聖祖以八歲卽位。

〔太師鼈拜〕滿洲廂黃旗人，姓瓜爾佳，以護軍校從太宗征戰，屢立功績，世祖入關後，戰功尤著，張獻忠卽其所手刃也。世祖卒，以少保與內大臣索尼、蘇克薩哈、遏必隆同受命爲輔政大臣，至康熙七年拜太師。

〔鼈拜專權刑賞自己出〕鼈拜嘗以私怨，構殺內大臣費揚古、侍衛倭赫等，與蘇克薩哈本姻婭，因論事齟齬而成讎，遂藉事構之，謂其觖望蓄異志，應磔死。聖祖知其枉，鼈拜攘臂強爭，卒予絞，並誅其族屬。又嘗籍犯罪者家產，與其弟穆里瑪、禁言官上書，其事擅多類此。

〔聖祖計執鼈拜〕鼈拜當國，勢張甚，以聖祖幼，肆行無忌。聖祖在內，日選小內強監有力者，令之習布庫以爲戲（布庫滿語也，相關賭力）。鼈拜或入奏事，不之避也。鼈拜更以聖祖弱而好弄，心益輕之，一日入內，帝令布庫擒之，十數小

兒立執鼈拜。（按：令布庫擒鼈拜，見姚元之《竹葉亭雜記》。惟《嘯亭雜錄》云：聖祖以奕棋召索額圖入謀，數日後鼈拜入見，召羽林士卒立擒之，并誌之以備參考。）

〔聖祖始親政〕聖祖原以康熙六年行親政禮，惟大權仍在鼈拜手。至康熙八年，拜既被執，始實行親政。

〔平西王之勢力〕三桂原以世祖時受封爲平西王，王雲南，至康熙初，明裔已剪除，罄絕，惟開創諸將如三桂等者，猶分鎮封土，握兵馬財政之權，隱如敵國。

〔撤藩歸遼之詔〕聖祖親政，知藩鎮強大，非國家之利，陰爲之備。時平南王尚可喜、王廣東、靖南王耿精忠、王福建，可喜以受制於子之信，疏請歸老遼東，留子鎮粵，部議以父子分離不便，請撤全藩。三桂及耿精忠聞之，亦疏請安插，以相嘗試。聖祖以三桂等撤亦反，不撤亦反，決計下詔撤歸遼。

〔三桂起兵稱帝〕三桂以康熙十二年，自稱天下都招討兵馬大元帥，移檄起兵，以次年爲周王元年，十七年建號卽帝位。

〔各省之響應〕三桂既起兵，平南王尙之信、靖南王耿精忠皆起兵附三桂，數月

間、雲貴、閩、川、湘、粵、桂七省，盡非清所有，又略江西、浙江，亦爲精忠所克，陝、甘、響應、中原大震。

〔爲聖祖所平〕聖祖以次削平各地，之信精忠均見殺，三桂稱帝不久卒，子世璠嗣，清兵分三路攻雲南，至二十年克之，世璠自殺。

〔定臺灣〕三桂之起兵也，臺灣鄭經以兵略福建沿海郡縣，經以康熙二十年卒，國內亂，清閩督姚啟聖薦水師提督施琅俾攻臺灣，以二十二年克之，經子克塽降，鄭氏有臺，凡三十八年而亡。

〔服外蒙古〕外蒙古統稱喀爾喀部，清太宗時，數遣使通好，歲獻白駝一、白馬八、號爲九白之貢，順治中，貢使中絕，至康熙中，爲準噶爾所逼，舉衆內附，康熙三十六年，噶爾丹平，復還喀爾喀舊部，於是外蒙古盡臣服，爲我國領土之一部分。

〔增駐防兵〕世祖入關之初，以盛京爲發祥重地，命內大臣爲總管，統轄兩翼官兵，爲駐防所自始，嗣是凡直省形勝要地，以次分遣八旗兵駐守，至康熙時，屢有增廣。

〔巡遊塞外江南二句〕聖祖於秋冬農隙講武之時，輒往邊外閱視，至康熙二十二年，幸熱河避暑，自是每歲夏月啟行，至秋則舉獮狩之禮，藉與蒙古王公相接洽，嘗出古北口，獨石口，張家口，巡覽各地，其巡江南凡六度，四度閱河，一度閱兵，所至地方，均普免錢糧一次。

〔永免滋生人丁之賦〕我國取民之制，有田則有賦，有丁則有役，清沿舊制，於田賦外，另科丁銀，以爲代役之價，故有編審戶口之法，五年一舉，丁增而賦隨之，迨康熙五十二年，乃以當時丁冊定爲常額，續生人丁，永不加賦。

〔羅致文人學士三句〕聖祖初年，明室遺臣，多有存者，士大夫或以逸民自居，聖祖知此輩當以恩禮羅致之，乃舉博學鴻儒，備顧問，著作之選，試以詩賦，授爲翰林院官，纂修明史，又常與游宴，飲酒賦詩，以資和洽。

〔優待天主教士〕如賜湯若望（德意志人精天文學）葬銀，寵任南懷仁（比利時人精天文學）掌欽天監，卒時賜諡賞銀之類。

〔習其測算格致之術〕測量學如地圖之經緯度線，算學如代根方及曆數，格致學如蒙氣之理，地球及潮汐之理，定南針偏差及磁石之理。（見康熙幾暇格

物編) 均本西說以發明

第四 中俄界約

本文 方清世祖入關之際、俄羅斯已奄有西伯利亞、東南與黑龍江為隣、黑龍江以北、本中國邊地、唐時為黑水府北境、清太宗既定黑龍江、并收服江北諸部落、及世祖入關、黑龍江北境不設備、俄羅斯侵佔其地、築城置戍、諸部落皆被擄、清聖祖遣兵毀其城、又命荷蘭商人轉告於俄羅斯帝、時俄帝大彼得新立、方有事於歐洲、不欲與中國為難、乃贈聖祖圖書器物以通好、兩國各遣使者訂界約於尼布楚城、以額爾古納河以東、外興安嶺以南、為中國領土、謂之尼布楚約、

準備

一 畫中俄邊界圖於黑板、指示之曰、此為我國當清康熙時、與俄國邊界劃分之圖、圖中之外興安嶺、及額爾古納河、為中俄界線、黑龍江及烏蘇里江流域之全境、庫頁島之全部、均我國領土、烏蘇里江以西為松花江、又西為內興安嶺、又西為沙漠、均在中國境、外興安嶺以西之貝加爾湖、則在俄境、尼布楚城、

即立約之地也、

二 問我國古時曾與俄國有交涉乎、答元代成吉思汗、及其子孫、曾以兵力擊俄為屬土、是時俄勢可謂弱矣、然其子孫不久自強、遂擴其國勢於東方、汝曹知之乎、


三 問我國自前清之季、至民國之初、外交困難、不已達於極點乎、答曰、然、然而當清盛時、曾結有一極榮譽之條約、儻亦汝曹所樂聞乎、
(因書尼布楚約四字於黑板)

教授事項

(甲) 時間分配 本課分二時、

第一時 方清世祖入關之際、至

中俄邊界圖



轉告於俄羅斯帝

第二時 時俄帝大彼得新立至謂之尼布楚約

(乙) 內容提示

- 一 於黑龍江以北之本爲中國邊地，見其地根據歷史上之關係，確爲我國之所有。
- 二 於清世祖時黑龍江北境之不設備，遂招強隣之侵佔，可見欲保守領土之主權，不可不備之於平時。
- 三 於清聖祖之爭回主權，訂立界約，見其尊重領土，且中俄之爭，亦因之而永除，可見能保守領土者，始能免兩國之爭。

參考

〔俄羅斯奄有四伯利亞〕俄羅斯以民國紀元前四百三十二年，即明憲宗成化十六年，宜萬三世始滅元裔欽察汗自立，子孫繼之，以次合併蒙古諸汗國，時有西伯爾汗者，據西伯利亞西部，亦爲俄所滅，進據其地，數傳之後，遂奄有四伯利亞全部，事在紀元前二百七十六年，即明思宗崇禎九年，在清世祖入關

前八年

〔黑龍江以北之歷史〕唐明皇時，於黑龍江地方，置黑水州，尋置黑水都督府，江之北岸，即府之北境，清初有索倫達瑚爾等部居之，並歸服太宗。

〔俄佔黑龍江之歷史〕先是通古斯種人之入俄境者，盛言外興安嶺以南之肥美，俄人豔之，銳意南下，紀元前二百六十九年（明崇禎十六年）可薩克人波雅爾古者，歷覽黑龍江下游，凡三年，具以所見歸告俄將軍，會清方有事中國，不暇注意東北，俄將喀巴羅遂以紀元前二百六十一年（清順治七年）引兵達索倫部人所居之雅克薩地（今俄屬阿穆爾省西境）戰勝土酋，翌年，遂築城雅克薩河口，於是沿江而下，達松花江，赴烏蘇里江，沿路之部落，皆爲所奪，〔聖祖遣兵毀其城〕俄佔雅克薩後，與我國時有衝突，康熙時，俄益經營雅克薩，聖祖先遣人探之，隨以二十二年，擊破俄兵於愛琿（今俄屬阿穆爾省海蘭泡，即舊時之愛琿附近），次年，又會戰於雅克薩城下，俄力不支，退至尼布楚（今俄屬薩拜喀勒省境），我兵毀其城而還，獻俘京師。

〔命荷蘭商人轉告俄〕城毀未幾，俄復遣兵東來，至城之舊址，築土壘爲防禦計，

我軍以康熙二十五年，擊斃其將圖爾布青，以長圍困之，聖祖以荷蘭人之介紹，致書俄帝，諭曲直。

〔大彼得〕為歐洲有名帝王，微時居莫斯科（俄之舊都）旁邑，與羣兒戲作蒼頭銳士狀，稍長，結豪俠，組織遊戲隊，慨然有蕩平世界之志，游學列國內，修政事，外拓疆土。

〔大彼得之通好〕彼得新即位，方欲擴勢力於歐洲，且與瑞典波蘭時有戰事，雅克薩距離國都絕遠，調援兩難，因復書通好，自認邊人構釁之罪，遣使詣邊定界，請釋雅克薩之圍。

〔尼布楚城之訂約〕康熙二十八年，俄使費要多羅與中使索額圖會於尼布楚，張幕城外為議場，聖祖命都統耶坦發兵一萬，自愛琿水陸並進，為使臣後援，以國界之爭，議久不決，幾決裂，耶坦拔營向尼布楚城，旦夕將宣戰，俄使不得已，乃讓步，中使亦以天主教師之勸告，稍遷就，國界之議乃成，兩國公使各以國文約書相交換，是為尼布楚約。

〔尼布楚約之大意〕一、自黑龍江支流格爾必齊河，沿外興安嶺以至於海，凡嶺

南諸川注入黑龍江者屬中國，嶺北屬俄，二、西以額爾古納河為界，河南屬中國，河北屬俄，三、毀雅克薩城，雅克薩居民及物用，聽遷往俄境，四、兩國獵戶人等，毋許擅越國界，違者送所司懲罰，五、兩國彼此不得容留逃人，六、行旅有官許文票者，得貿易不禁。

第五 喀爾喀

本文 喀爾喀，即外蒙古也，外蒙古之地，漢時匈奴，唐時突厥回紇，皆居之，唐人嘗於其地，分置府州，隸屬都護府，元時置為嶺北行省，視同內地，元亡後，部落留於外蒙古者，號喀爾喀，清聖祖之世，喀爾喀各部自相攻，適準噶爾強於西方，引兵襲喀爾喀，喀爾喀不能敵，數十萬衆皆瓦解，盡棄其牲畜帳幕，先後東奔，聖祖發粟給畜以賑之，往朝其部衆於多倫泊，在直隸多倫諾爾安輯其王公，親率兵破準噶爾，而反喀爾喀於外蒙古，俾復其故土焉，先是，喀爾喀之被襲於準噶爾也，衆欲奔俄羅斯，哲卜尊丹巴刺麻曰：俄羅斯與我不同教，必視我為異類，不如歸附中國，衆從其言，若刺麻者，誠能為部衆謀萬世之利矣。

準備

一 問中華民國領土，除各行省暨西藏青海及內蒙古外，尙有何地，答外蒙古。（如學生不知則大書外蒙古三字於黑板以示之）汝曹須知此外蒙古地方其隸吾版圖，不自今日始，在距今二千餘年前，已與吾國有密切之關繫，距今一千二百餘年前，已隸屬吾國，距今六百餘年前，已列入行省，而其最近，則距今二百二十餘年前，曾受吾國之卵翼，以保其生命而全其財產，汝曹須誌之。

二 因書外蒙古之略表於黑板如下：（一）漢之匈奴，（二）唐之都護府，（三）元之嶺北行省，（四）清之喀爾喀。

教授事項

（甲）時間分配 本課分二時

第一時 喀爾喀至俾復其故土焉

第二時 先是至誠能爲部衆謀萬世之利矣

（乙）內容提示

一 於外蒙古隸入中國之歷史，見其久屬一家，久爲兄弟，其情義之密合，非他人所得而間阻。

二 於喀爾喀之受攻準部，清聖祖之賑給及復其故土，見一家兄弟之互相救援，如手如足，情誼甚深，吾曹當永遠廢續此兄弟之義務。

三 於哲卜尊丹巴之決歸中國，見其深明去就之大義，不負外蒙古人之供養。

參考

〔喀爾喀〕即今外蒙古四部，一、直隸古北口邊外漠北，爲車臣汗部，二、直山西大同邊外漠北，爲土謝圖汗部，三、直甘肅寧夏邊外漠北，爲三音諾顏汗部，四、直甘肅肅州邊外漠北，爲札薩克圖汗部，就中三音諾顏部，爲雍正時所增設，分土謝圖汗旗衆以隸之者，康熙時僅三部。

〔漢匈奴〕見第一冊第十五課

〔唐突厥回紇〕突厥見第二冊第四第五課，回紇見第二冊第七課。

〔隸屬都護府〕唐太宗貞觀初，李靖擊滅突厥，回紇及薛延陀並稱強，李勣滅薛延陀，回紇遂并其地，貞觀四年來朝，以其地爲瀚海，燕然，金微，幽陵，龜林，盧山六郡，號都督府，又置皋蘭，高闕，鷄田，榆溪，雞鹿，歸林，賓顏等七州，以部長爲都督，刺史，長史，司馬，皆隸燕然都護府。

〔元嶺北行省〕先是元太祖初立元昌路，後改轉運和林使司。世祖時置都元帥府，成宗（世祖孫）時立和林等處行中書省，統和林總管府。仁宗（世祖曾孫）時改嶺北等處行中書省，以和林路爲和寧路。

〔元亡後之部落〕元亡後，其族人有所脫脫不花者，爲五刺部長所立，號韃靼可汗。（見第三冊第七課）旋爲五刺部長所弑，部人復立其子爲克汗，號小王子。（見第三冊第九課）數傳至達延汗之子達賚遜，徙慕東方，爲察哈爾部之祖。其末子札雅爾，留長漠北，爲喀爾喀部之祖。

〔喀爾喀各部自相攻〕康熙二十三年，土謝圖汗與札薩克圖汗有隙，攻之而奪其妾，構兵不解。

〔準噶爾強於西方〕準噶爾於明時屬五刺，五刺自也先死，部落分散，其在天山北路者分爲四部：一曰和碩特，居烏魯木齊附近；一曰杜爾伯特，居額爾齊斯河域；一曰土爾扈特，居塔爾巴哈台附近；一曰準噶爾，居伊犁。康熙中，準噶爾酋噶爾丹兼有四部，勢張甚。

〔準喀之爭戰〕噶爾丹乘喀部內鬩，謀進兵，乃使使辱土謝圖汗以激其怒。土謝

圖汗執殺之。噶爾丹因藉詞報復，揚言借俄兵且至。土謝圖探無其事，守備懈。噶爾丹遣喇嘛僧衆游牧其地，爲間諜。土謝圖亦弗問。康熙二十七年，噶爾丹率騎三萬突來襲，游牧喇嘛從中應之。土謝圖部大敗，悉衆東走。噶爾丹乘勝擊走車臣札薩克圖兩汗。

〔聖祖之賑卹〕喀爾喀三部既見敗，部衆數十萬，盡棄牲畜帳幙，投漠南請降。聖祖命尙書阿爾尼等賑之。三十年，親出塞外受其朝，大會閱於多倫泊，劃內蒙古水草地，俾游牧近邊，仍留其汗號，與內札薩克各旗同列。

〔破準噶爾〕喀部既南徙，噶爾丹以追土謝圖汗爲名，選銳東犯。聖祖親破之於烏蘭布通（今直隸赤峰州境）。未幾，噶爾丹復率騎三萬入寇。聖祖親征，將軍費揚古大破之於昭莫多（一名東庫倫在土拉河上流東岸）。噶爾丹以數十騎遁去。時伊犁舊部已爲其兄子所并，窮蹙靡所適。聖祖欲因而降之，幸歸化城，噶爾丹不至。復幸寧夏，遣將進師。噶爾丹不知爲計，仰藥死。

〔反喀爾喀於外蒙古〕噶爾丹既死，所部盡降。朔漠悉定，自阿爾泰山以東，皆隸版圖。拓喀爾喀西境千餘里，土謝圖等三汗復歸舊牧。

「哲卜尊丹巴刺麻」先是達賴三世有高德，得蒙古諸部尊信，至青海及漠南說教，已而俺答曾孫嗣爲達賴四世，其勢力延及漠北及伊犁等地，而漠北諸部以所處僻遠，不得親承達賴命，乃自奉宗喀巴第三弟子哲卜尊丹巴後身爲主教，處諸庫倫，以總理蒙古教務，位與班禪刺麻相亞。

「俄羅斯不同教數句」俄所奉爲希臘教，常衆議走俄時，哲卜尊丹巴曰：俄羅斯案不尙佛，俗尙不同，莫若攜全部內徙，歸投中土，可邀萬年之福，衆欣然羅拜，度漠內附。

「不如歸附中國」中國爲天然之宗教自由國，前清之初，對於刺麻教徒，亦頗優待，故哲卜尊丹巴云云。

第六年 義堯

本文 清聖祖卒，子世宗卽位，聖祖晚年，諸皇子覬覦君位，植黨相爭，世宗之卽位也，諸兄弟有不服者，世宗嚴罰之，解散其黨，與任用才能，整飭吏治，改雲南貴州土司爲流官，以收統一之效，又命年羹堯爲大將軍，平青海之變，自明世瓦刺散亡以來，遺族有居於青海者，至是青海部長，以與準噶爾同族，欲與之連合，

因以部衆叛，刺麻數千爭助之，羣起騷動，衆至數十萬，年羹堯迭破其兵，督軍前進，明時所賜刺麻國師禪師之印，皆被收，部長遁入準噶爾，青海遂平，年羹堯既有大功，號令西邊，威權甚盛，爲帝所忌，誣以謀叛而殺之，并籍其家，

準備

一 問國家何以必求賢將，答用以平亂而禦侮，今爲汝曹述有清時代平亂禦侮之賢將，（因書年羹堯三字於黑板）

二 問爲國家平亂禦侮，非大功乎，答曰然，國家對於有大功之人當何如，答當賞，如何而後當殺，答必其背叛國家，今有並未背叛國家，轉以有大功故，蒙背叛國家之罪者，此不爲專制史上之慘劇乎，今爲汝曹述有清時代演此慘劇之君主，（因書清世宗三字於黑板）

教授事項

（甲）時間分配 本課以一時授完。

（乙）內容提示

一 於聖祖諸子君位之競爭，見此輩心目中，祇有利祿思想，無爲國家服務思

想，致演成骨肉仇讐之怪象。共和時代之對於政權，宜懸此怪象爲厲禁。
二、於年羹堯之功高被戮，見專制之慘無人道。民國則無論有功與否，非根據法律，不得擅行逮捕，視彼時直有天淵之別。

參考

〔世宗〕名胤禩，聖祖第四子，在位十八年。

〔聖祖諸子之爭〕聖祖原立第二子允禔爲太子，後以狂疾廢，已而又立之，未幾復廢。時康熙五十一年也。於是聖祖不復立太子，諸子中希冀君位者，多爲祕密之運動，就中運動最力者，爲長子允禔、八子允禩、九子允禩、十子允禩、十四子允禩等，皆蓄術士，結宦官，廣通聲氣，使爲己延譽。世宗亦彼時運動潮流中之一也。

〔世宗之處置兄弟及其黨與〕世宗兄弟中，以允禩才望爲最高，允禩與允禩相左右。世宗之立也，忌二人特甚。禩原封廉親王，禩原封貝子。世宗疑其怨望不服，文致其罪以廢之。因更禩名阿其那，禿名塞思黑，其門客之類，亦爲世宗所刪刈。

〔任用才能〕如鄂爾泰、李衛、田文鏡、岳鍾琪之類，皆是年羹堯尤以武功顯。〔整飭吏治〕世宗承聖祖寬大之後，頗以嚴肅爲治，督撫不稱職者多得罪，吏治有澄清氣象。

〔改雲南貴州土司爲流官〕雲貴一帶之土司，向於中國境內爲特別區域，其民苗、獠、雜處，風氣不開。土司恣意暴虐，大吏不之問，勢同化外。世宗用鄂爾泰議，改土歸流，爾泰佩雲貴廣西三省總督印，討平變亂，卒達改流之目的。

〔年羹堯〕奉天廣寧人，以進士歷官至四川陝西總督，管理軍務。世宗雍正元年，青海變起，特授爲撫遠大將軍。

〔青海〕以域內有青海得名，在中國全部之中央，自內地準望，則偏於西北。

〔瓦剌遺族之居住〕青海自唐以來，世爲吐番屬境。明武宗後，始爲蒙古部酋所據。明末，瓦剌族之和碩特部固始汗，自烏魯木齊據有其地。

〔青海部長與準噶爾同族〕同爲瓦剌族，詳本冊第三課參考內準噶爾強於西方條。

〔青海部長之叛〕固始汗於世祖時受封爲汗，聖祖時其子率族來朝，封親王，傳

子羅卜藏丹津有異志，會世宗新立，因決計獨立，結準會策妄阿布坦（噶爾丹兒子）與之聯兵。青海有大刺麻，曰察罕諾們汗者，自西藏分支，住持塔爾寺，爲黃教之宗，番夷信仰。丹津誘使從己，於是遠近風靡，游牧番民及刺麻等二十餘萬，同時騷動，西寧戒嚴。

〔年羹堯之督軍〕 羹堯分兵北扼疏勒河（即蘇賴河在甘肅安西州）防丹津內犯，南守巴塘（今四川巴安府）裏塘（今四川理化府）等地，斷其入藏之路。又請重兵屯吐魯番（今吐魯番廳）等地，絕其與準部之交通，而參贊岳鍾琪復出師相機勦撫，西邊數千里皆肅清。

〔部長之遁〕 丹津聞清軍至，倉皇大潰，丹津衣番婦衣，騎白駝遁，其母弟及妹並就俘，降者數萬人。清軍窮追丹津不及，丹津已越沙漠投準部。

〔大功見忌〕 年羹堯既平青海，世宗封爲一等公，恃功驕縱，日積猜嫌，遂多無謂之指摘。（羹堯嘗以日月五星之瑞上賀本世宗謂本內字跡潦草，且將朝乾夕惕寫作夕惕，朝乾是不欲以朝乾夕惕四字歸之朕，既不以是許朕，則年羹堯青海之功亦在朕許與不許之間，而未有定也云云）羣臣迎合，彈劾者緣

飾上奏無微不至。

〔誣羹堯謀叛而殺之〕 世宗降羹堯爲杭州將軍，旋逮京嚴鞫，下旨列諸臣會議九十二款，謂應服極刑及立斬者三十餘條，寬其磔死，賜自盡。

〔并籍其家〕 世宗以年羹堯之子甚多，惟年富居心行事與年羹堯相類，著立斬，其餘十五歲以上之子著發遣廣西雲貴極邊煙瘴之地充軍，年羹堯之妻係宗室之女，著遣還母家，年羹堯及其子所有家貲俱鈔沒入官，其現銀百十萬兩著發往西安以補年羹堯川陝各項侵欺案件，年羹堯嫡親子孫將來長至十五歲者皆陸續照例發遣，永不赦回，亦不許爲官，有匿養年羹堯之子孫者以黨附叛逆例治罪。

第七 清高宗

本文 世宗卒，子高宗卽位，聖祖至高宗爲清代極盛之世，現今中國之領土亦完成於高宗之時，其統一之功甚鉅。高宗統一之政略若新疆設官，使回族與滿漢人民平等，若平定金川，以靖四川之邊徼，若征服廓爾喀，以鞏西藏之主權，皆卓卓可稱者，惟經略緬甸安南均無所利。時承平日久，帝又有武功志意驕

矜、務張君權、防抑臣下、自清人入關以來、以文字觸諱、禍及家族者、相續不絕、帝猜清忌尤深、冤獄迭起、乃至前朝書籍、亦多燬、高禁、人民言論之不自由、未有甚於此時者、宗也。

準備

一 寫清高宗像四字於黑板、(像爲奉天清故宮所收藏) 指書中圖示



之曰、此寫清高宗騎射時之狀態、頂胄披甲、負矢乘馬、氣象雄毅、確爲吾國滿族中傑出之人才、

二 懸中華民國輿圖於壁、指示之曰、此吾民國完全之領土也、自太古以來、中華領土、或擴張、或收縮、或分裂、或統一、其能擴張或統一之者、皆歷史上有功之人、而高宗亦有功者之一也、

三 人各有短長、不可相掩、清高宗播揚國威、擴張領土、固足爲吾國歷史之光、而其短處則絕無可諱、汝曹知其短惟何、因大書如下曰、一文字之冤獄、二書籍之焚燬、

教授事項

(甲) 時間分配 本課分二時、

第一時 世宗卒至均無所利

第二時 時承平日久至未有甚於此時者也

(乙) 內容提示

一 於高宗統一之功、當起效法之觀念、民國國民、當永遠保全此完全之領土、

庶不負其經營之力。

二 於高宗之使回族人與滿漢人民平等、實爲統一上最要之政策、民國五族一體、卽本此政策而擴充。

三 於高宗之務張君權、不惜奪人民言論之自由、足見專制之爲禍甚烈。

參考

〔高宗〕名弘曆、世宗第四子、在位六十年。

〔現今中國之領土二句〕今中國二十二行省、及內外蒙古、青海西藏、三千二百餘萬方里之幅員、其完全組合、實在於清高宗時代。

〔新疆〕今爲行省之一、在全國西北、內分準部回部、準部居天山北路、回部居天山南路。

〔新疆設官二句〕高宗於回部、設總統伊犁等處將軍、參贊大臣、辦事大臣、同知總管等官以經理之、而以準部之烏魯木齊、建爲迪化州、分屬甘肅省、（今爲新疆省治）其準回二部之歸順者、封爵世襲有差、並設有分理回務諸伯克、以統理其衆、分境鈐轄、盡如內地焉。

〔金川〕今四川懋功廳、以大小二金川河得名、在金沙江之上游、山有金鑛、明時木金川寺演化禪師所封地、後分爲兩部、其居小金川流域者、曰攢拉、居大金川流域者、曰促浸、清順治時、授小金川僧吉細土司職、康熙時、授大金川僧嘉勒巴演化禪師印、俾分領其衆、嘉勒巴孫莎羅奔、復於雍正初授爲金川安撫使。

〔平定金川二句〕乾隆時、大金川僧莎羅奔勢漸強、劫小金川僧澤旺奪其印、又攻打箭鑪（今四川康定府）附近諸土司、擊傷赴援之官軍、高宗遣張廣泗討之、師久無功、後遣傅恆、岳鍾琪進兵、莎羅奔始降、已而其嗣僧索諾木、與澤旺子僧桑格同叛、屢敗官軍、旋遣阿桂、豐伸、額明亮等擊破之、索諾木獻僧桑格之尸乞赦罪、未幾率衆降、金川悉平、川邊乃靖。

〔廓爾喀〕在西藏之南向、爲中國藩屬、於雍正時、嘗奉金葉表、貢方物。

〔征服廓爾喀二句〕乾隆五十六年、廓爾喀以事侵擾後藏、大掠而去、高宗命福康安征之、揮軍深入、累戰大捷、逼其都城、廓民震恐、環赴大軍乞降、還獻所掠高宗許其內附、定十年一貢例、高宗因收回西藏之主權、令駐藏大臣、兼握政治。

財政及兵備之權、而以教權專屬之達賴、西藏始純爲中國之領土、

〔經略緬甸〕先是乾隆三十年、緬甸侵略諸土司、入犯雲南沿邊、官兵與戰輒遭敗、高宗命明瑞傳恆等先後討之、明瑞深入無繼、師潰自殺、傳恆軍進攻不下、將士病瘴、遂與緬和、緬對中國行表貢禮、兩國各放還俘虜、至五十五年、始受中國封冊、爲緬甸國王、

〔經略安南〕先是安南王黎維禧、於清初受封奉貢、至乾隆間、安南內亂、其王維祁爲阮文惠所迫遜位、並毀王宮、高宗遣孫士毅率兵入東京、復立維祁、士毅恃勝不設備、爲文惠所襲破、維祁復失國、文惠慮中國再討、更名光平、遣使奉表乞降、後以五十五年、受冊封爲安南國王、

〔清之文字獄〕清之入關也、所過屠戮、士夫頗有訾議、遂爲世主所猜疑、加以諸臣迎合、於文字多所吹求、大獄以起、康熙間則有明史（爲莊廷瓏所刊、內有關涉清事者）、南山集（爲戴名世等、內有與友書言當爲明末三王作紀）、諸獄、雍正時則有查嗣庭錢名世呂留良諸獄、皆以箸作得罪、誅戮極衆、

〔高宗時冤獄之迭起〕高宗時之文字獄、幾不可數計、往往賦詩作文、語涉疑似、

卽被以大逆不道之罪、

〔燬禁書籍〕高宗開四庫全書館、一方網羅書籍、一方則刺取與清代有反對者、或疑似者、燬而禁之、凡被燬二千有餘種、


第八 準噶爾

本文 高宗統一之功、以收服新疆爲最著、新疆自漢唐時、已爲中國領土、至於清初、新疆北部爲準噶爾所據、南部則回部領有之、準噶爾者、瓦剌之裔也、自明中葉後、散居西北、至清初而復盛、進掠喀爾喀、爲聖祖所敗、及世宗平青海、青海部長逃入準噶爾、世宗以兵駐科布多、攻之、不能勝、高宗卽位、準噶爾內亂、部落相繼來降、旋又叛、爲高宗所平、并平回部、授其部長爵職、而設官置戍於新疆、於是新疆復歸中國之版圖、高宗既定新疆、新疆以西諸國、自浩罕至阿富汗、皆入貢、又有土爾扈特部者、亦瓦剌之族、居於俄羅斯、苦俄人壓制、率全部十餘萬人來歸焉、

準備

一 畫清疆域圖於黑板、指示之曰、此爲前清盛時之疆域圖、其西北爲阿爾泰

清 疆 域 圖



教授事項

(甲)時間分配 本課分二時

第一時 高宗統一之初 至於是新疆復歸中國之版圖

第二時 高宗既定新疆 至率全部十餘萬人來歸焉

(甲)內容提示

山脈、畫虛線進遞向東北、爲中俄界線、尼布楚在額爾古納河之北、爲康熙時尼布楚約所劃定、其時黑龍江北岸、在我界線內、今則不勝滄桑之感矣、阿爾泰山脈之南、曰天山山脈、爲準回天然之界線、其東爲喀爾喀、爲沙漠、其南則崑崙山脈、分三支、一支趨東北、直達黑龍江地方、青海在其南、內蒙古在其東南、瀋陽山海關及朝鮮在其東、長城橫過之、長城以南爲北京、一支向東爲北嶺、江河之所從出也、一支趨東南爲南嶺、至西藏以南、則喜馬拉耶山脈在焉、畫虛線進遞向東南、復東行至於海、爲中廊中緬中越之界線、其時廓爾喀越三國與朝鮮、均我國屏藩、海中之臺灣、則我國領土、今皆不勝滄桑之感云、

二 我國屏藩之國、不止上列諸國、有爲本圖所未畫入者、今當爲汝曹述之、

- 一 新疆自漢唐時已爲中國領土，吾先民之糜費心力於此土者，蓋已不可勝數，就歷史一方觀之，不得不起愛重領土之觀念。
- 二 於清聖祖世宗高宗之經營，又不知費幾許心力，始收新疆入版圖，就最近歷史一方觀之，尤不得不起愛重領土之觀念。
- 三 新疆一定，則諸國入貢，遠人來歸，武功之關係國勢蓋如此，愛國男兒之不可不尙武蓋如此。

參考

〔新疆自漢唐時已爲中國領土〕漢時準部地方，東境爲匈奴右部，西境爲烏孫國，未服屬中國，回部地方，前漢爲城郭三十六國，都護所治，後漢爲城郭五十餘國，都護及長史所治，唐時準部地方，隸北庭都護府，回部地方，隸安西都護府。

〔清初之準部回部〕準部見本冊第三課參考內準噶爾強於西方條，回部舊汗本元裔，奉佛教，當明之中葉，回教士和卓木，始至喀什噶爾，爲天山南路有回教之始，迨清初，和卓木亞巴克立爲汗，回教勢力益盛，各城靡然從之，回部之

稱自此始。

〔準噶爾明清時代之略史〕見本冊第三課參考內準噶爾強於西方條。

〔進掠喀爾喀二句〕見本冊第三課參考內準喀之爭戰條，及破準噶爾條。

〔世宗平青海二句〕見本冊第四課參考內。

〔世宗駐兵科布多〕青海曾羅卜藏丹津之逃入準部也，世宗遣使索之不獲，時準酋爲策妄阿拉布坦，未幾卒，子噶爾丹策零嗣之，遣使來朝，世宗令執獻丹津，遷延不獻，而詭詞以緩清兵，復乘西路備弛，發兵犯邊，縱掠駝馬，世宗乃決戰，遣傅爾丹進駐科布多城，（距京師六千二百餘里，在外蒙古札薩克圖汗部之西）

〔攻之不能勝〕傅爾丹與準戰於博克托嶺，（阿爾泰山脈之一嶺）殺傷略相當，進至和通淖爾，（在科布多西二百里）大敗，傅爾丹以殘兵還至科布多，後遣錫保馬爾賽等往征之，均無功，惟額駙策凌，（後以功封三晉諾顏王）曾兩次擊退準兵，遂以議和終其局，（和議定於乾隆二年，以阿爾泰山爲準喀界線）

〔準噶爾內亂〕準酋自噶爾丹以來三世皆驍傑，善用兵，迨噶爾丹策零卒，子那

木札爾立、童昏無行、所部遂亂、部衆殺之、立刺麻達爾濟、阿睦爾撒納復殺之、而立達瓦齊、準部之騷亂、達於極點、

〔部落相繼來降〕方刺麻達爾濟之立也、殺其貴族策妄達什及達什達瓦、於是達什達瓦部下薩拉爾、率千餘戶內附、迨達瓦齊立、阿睦爾撒納漸跋扈、爲達瓦齊所攻、思借中國兵力、乃與其兄及杜爾伯特台吉、率所部萬餘人來降、準部驍將瑪木特、亦脫身來歸、高宗因遣將擊伊犁、達瓦齊出走、在道被獲、

〔部落復叛〕高宗之遣將擊伊犁也、阿睦爾撒納以副將軍從征、及捷聞、封阿睦爾撒納爲親王、阿睦爾撒納冀兼長四部、不樂受封爵、遂乘清兵凱旋時、煽其部衆爲亂、

〔高宗平準部〕高宗命兆惠率大隊、長驅討準部、賊衆皆敗死、阿睦爾撒納走俄邊、旋疫死、於是準部悉平、

〔平回部〕回部舊爲準部所刺、及清軍平伊犁、回酋大小和卓木來降、阿睦爾撒納死、小和卓木反、傳檄各城、同時回部俱反、高宗遣兆惠討之、各城盡復、和卓木兄弟出走、旋就擒、未幾、烏什（今烏什縣）回民變、亦擊平、回部大定、

〔授部長爵職〕有郡王貝勒貝子輔國公之封、皆世襲、

〔設官置戍於新疆〕設官見前課、置戍則駐防旗兵萬五千餘名、綠營兵分駐各要地、

〔蔥嶺以西入貢之國〕除浩罕（一稱霍罕、今屬俄）阿富汗（一稱愛烏罕、今爲王國）外、有左哈薩克、右哈薩克（今均屬俄以下同）東布魯特、西布魯特、塔什罕、巴達克山（在阿富汗之東下同）博洛爾、布哈爾（在浩罕之西、今屬俄）均自新疆平定後入貢、

〔土爾扈特之來歸〕土爾扈特、故爲瓦剌四部之一、噶爾丹強時、併有其地、其酋和鄂爾勒克、挈部人走俄、居於烏拉河附近、七傳至渥巴錫、率人口十六萬餘、自俄境脫走、達伊犁、時乾隆三十七年、新疆久定、伊犁將軍嚴兵備邊、使人迎詰之、渥巴錫以願歸中國對、高宗因封渥巴錫爲汗、

第九 白蓮教天理教

本文 高宗晚年、寵任宰相和坤、貪賄弄權、政事敗壞、內亂迭起、自此以後、遂爲清室憂患之時期、白蓮教者、卽元之白蓮會、明中葉後、亦嘗起亂、然不久卽平、

至高宗之季，而白蓮教復起，其教假持齋治疾以聚衆，迨黨羽既盛，遂舉兵，欲覆清室，縱橫四川陝西甘肅湖北河南五省，勢甚張，高宗屢出師，皆無功，高宗卒，子仁宗親政，誅和坤，除弊政，專任賢將，白蓮教始平。未幾，天理教又起，天理教又名八卦教，亦以傾覆清室爲志，北方人民多附之，教魁林清，聯合宮中太監，侯仁宗出駐熱河，聚衆入宮起事，然倉卒無援，遂爲禁軍所殲，黨人之舉兵於河南直隸山東者，亦皆敗沒。

準備

- 一 問中華民國，非信教自由之國乎？答然，汝曹據所讀之歷史，已知之，宗教凡有幾？答佛教（見第一冊第十七課）天主教（見第三冊第十三課）回教（見本冊第六課參考內清初之準部回部條）及因佛教發生之喇嘛教，內分紅教與黃教（見第三冊第十課）
- 二 以上所舉之教，皆以勸人爲善爲宗旨，故有宗教之資格，若焚香聚衆，結黨營私，以爭奪爲宗旨，即無宗教之資格，即不得援信仰自由爲口實，因書白蓮教天理教六字於黑板，指示之曰：此等皆非正當之宗教也。

教授事項

（甲）時間分配 本課以一時授完。

（乙）內容提示

- 一 於清高宗晚年之荒縱，便爲清室憂患之根原，見凡人不可自滿，一念自滿，即爲禍階。

- 二 於白蓮天理兩教之蜂起，即有人民附和，見吾國人民程度不齊，對於宗教，非宗教之區分，全未了解，故救國政策，不得不以普及教育爲前提。

參考

〔和坤〕滿州正紅旗人，初以官學生爲御轎役夫，一日高宗將出，倉猝求黃蓋不得，高宗云：是誰之過？與各員瞠目相向，不知所措，和坤應聲云：典守者不得辭其責，高宗見其儀度俊雅，聲音清亮，大器之，不次擢用，遂躋宰相。

〔貪賄弄權〕和坤貪黷無厭，徵求財貨，皇皇如不及，督撫司道畏其傾陷，不得不盡貨權門，結爲奧援。

〔政事敗壞內亂迭起〕和坤專政既久，吏風益壞，白蓮教匪之亂，即其所釀，和坤

復任意稽壓軍報，並令各路統軍將帥，虛張功級，以邀獎敘，而和珅亦得晉封公爵，且於覈算報銷，勒索重賄，以致將帥不能不侵剋軍餉，教匪且愈勦愈多，幾於不可收拾。

〔白蓮教即元白蓮會〕白蓮會見第三冊第三課，有明盛時，此會闕焉無聞，熹宗時，白蓮會蜂起，初薊州（今直隸薊州）王森者，得妖狐異香，創白蓮教，自稱聞香教主，就其徒設大小頭目及會主之號，蔓延各省。

〔明代白蓮教匪之亂〕王森被捕死獄中，子好賢及鉅野（今山東鉅野縣）徐鴻儒等，踵行其教，徒黨益衆，約於熹宗天啓五年中秋同起兵，會謀洩，鴻儒等遂先期反，自號中興福烈帝，舉兵陷附近數縣，卒爲官兵長圍，食盡，黨徒皆降，鴻儒以單騎遁，亦被擒，磔於京師。

〔清高宗時白蓮教復起〕高宗嚴禁白蓮教，然根株不絕，乾隆四十年，白蓮教首劉松者，以祈禱及符咒治病，頗著聞，派密使傳教於西部各省，事發流甘肅，後其徒劉之協等奉王發生，詭稱明裔朱姓，藉以煽誘聚衆起兵，事覺，王發生被擒，劉之協遠遁。

〔教匪之亂勢〕劉之協之遁也，令州縣大索不獲，荊州宜昌等地，株連甚衆，於是聶傑人等起荊州，姚之富等起襄陽（均在今湖北），四川則有孫士鳳等，陝西則有張士龍等，同時並起，一時西部各省，望風而靡。

〔屢出師無功〕永保恆、瑞舒、亮鄂、輝畢、沅等，俱奉高宗命討匪，日久無功。

〔仁宗〕名顥琰，高宗第十五子，乾隆六十年，受內禪即位，在位二十五年。

〔仁宗親政〕仁宗雖即位，實由高宗訓政，即尋常事件，亦須奏知高宗辦理，迨嘉慶四年，高宗卒，始親攬大權。

〔誅和珅〕高宗以嘉慶四年正月三日卒，越五日，即有御史廣興等，參奏和珅諸不法事，仁宗交刑部嚴訊，並查鈔家產，爲數當八萬萬兩，有奇，遂奪職賜死，革除和珅當國一切弊政。

〔任賢將平白蓮教〕仁宗以額勒登保爲經略大臣，德楞泰爲參贊，遂獲劉之協於葉縣（今河南葉縣），餘黨以次削平，時諸將中有楊芳、楊遇春，並以能戰名，號爲「二楊」云。

〔天理教〕白蓮教既平，政府嚴申禁令，不知其餘黨仍別立諸種名目，以相號召。

天理教卽其變名之一種，亦稱八卦教、八卦教之外，又有白羽會、三香會、順刀會、義和拳、大乘教、如意門、白陽教、種種名稱，實皆白蓮教之緒餘也。

〔林清〕直隸大興縣人。

〔入宮起事〕清與內監夙交通，使其黨二百餘人，由西華門進迫宮禁，內監爲前導，時仁宗方幸熱河，仁宗第二子綿寧聞賊薄宮門，急取烏槍，見有手白旗，攀垣欲進者，卽以鎗射擊，斃之，教徒始不敢逾垣進。

〔爲禁軍所殲〕林清原與山東李文成約，同日在京起事，文成先期事發，爲滑縣知縣捕下獄，斷其脛，其黨以事迫，不能爲定期之行動，先期陷滑，不及赴清約，清既入宮，無外應，會諸王大臣，率禁兵由神武門入，敗教徒於中正殿門外，清匿京外黃村，旋被擒。

〔黨人皆敗沒〕黨人之陷滑也，李文成遂出兵圍濬，萃精銳於道口，（濬縣南之要鎮，今道清鐵路發軔處，有城周六里有奇）號召直隸山東諸黨，數省督撫皆按兵不動，嗣由楊遇春擊破道口，劉清章照合破滑，文成走輝縣山間，爲楊芳所追及，自焚死，於是三省地方悉戡定。

第十 鴉片之戰

本文 清室當憂患之時期，受創最鉅，而影響亦最遠者，曰鴉片之戰，鴉片產於印度，明時已入中國，自英人據印度，輸入益多，嗜者日衆，仁宗子宣宗卽位，嚴禁之，然毫未有效，林則徐痛言其害，云：「煙不禁絕，數十年後，國弱民貧，非惟無可籌之餉，且無可練之兵。」宣宗乃命林則徐赴廣東，實行禁止，則徐既蒞粵，卽檄召英商，令繳鴉片，否則斷其食用，英商不得已，繳二萬餘箱，則徐盡焚之，并令永遠毋得售鴉片，英人既失大利，則以兵攻粵，不勝，乃迭擾沿海，進攻南京，宣宗懼，斥林則徐，遣使與英人和，償兵費，及所焚煙價，開上海、廣州、福州、廈門、寧波五口，爲通商場，并割香港以畀之。

準備

一 問汝曹何爲食粟，答將以療饑，何爲飲湯，答將以解渴，今有不能療饑，不能解渴，爲一種毒人之物，人中其毒，輒成痼疾，不能自脫者，汝曹知此爲何物，因大書鴉片二字於黑板，指示之，曰：「卽此物，卽此物。」

二 汝曹知此物不徒毒人，兼能毒國，蓋國積人而成，人受厥毒，則國隨之，貧於

是弱於是，而我輩距今八十餘年前之同胞生命，且流血暴骨於是，汝曹知彼時之流血暴骨，厥名爲何？因大書本課標題於黑板，大聲以告之曰：「即鴉片之戰，即鴉片之戰。」

三 汝曹所居里巷中，尙有吸食鴉片者乎？答有或無，現在中華民國，已實行禁吸，然而我國人民，受此毒害者，從前已不可數計，其能洞明此毒害，痛切欲禁之者，其功蓋不可沒，汝曹知最先嚴禁鴉片者何人？因大書林則徐三字於黑板，指示之曰：「即此人，即此人。」

教授事項

(甲) 時間分配 本課分二時

第一時 清室當憂患之時期至實行禁止

第二時 則徐既蒞粵至并制香港以畀之

(乙) 內容提示

一 於林則徐痛言鴉片之害，見其識見宏遠，我國現時，亦受此害之影響，故此事宜永遠剷除，急速剷除。

二 於英人之攻粵不勝，迭擾沿海，進攻南京，不能不恨沿海及南京之無人，使沿海及南京，人人盡如林則徐，夫復何患？故凡國家禍患，當全力抵禦，不當專倚賴於一二人。

三 於割畀香港，使我南方絕良軍港，爲他人之海軍根據地，見當時和約之失策，故凡國家之愛護領土，當比愛護生命，尤爲緊切。

參考

〔鴉片〕爲罌粟花殼內所含之汁，色黑味苦辣，臭惡可憎，鴉片二字，乃我國譯外國之音也，內含迷性毒質，計害有六：一損腦經覺性，二壞各臟功用，三消耗全身津液，四變壞血汁，五弱胃之消化力，六損肺之呼吸力。

〔產於印度〕印度恆河一帶，所在多有。

〔明時入中國〕明憲宗成化間，中貴收買鴉片，其價與黃金等，至神宗十八年，不視朝，或謂卽爲鴉片所困。

〔英人據印度〕英人以民國紀元前三百十三年，卽明萬曆二十七年，始設東印度公司，迨清康熙間，英人復有一商會，與舊公司合併，改稱東印度英商合衆

公司漸謀據地至嘉慶時全印大半歸英領

〔輸入鴉片益多〕先是明時已有鴉片附洋舶至粵清初亦相沿入口歲銷不過數百函在乾隆嘉慶年間曾兩次焚燒鴉片數千函道光之世毒遍中國英商舶年運數萬函進口有加無已

〔嗜者日衆〕鴉片入華之始其價甚昂嗜者僅殷富之家嗣以貨值漸低產額寢廣乃至內地亦徧植之嗜者日衆一般社會趨之若鶩甚至車夫負販流氓乞丐亦與爲緣憂世者有煙鬼（俗稱嗜鴉片者爲煙鬼）如林之嘆焉

〔宣宗〕名旻寧本名綿寧即槍擊白蓮黨人於宮中者也，在位三十年

〔鴉片之嚴禁〕先是嘉慶時仁宗嘗屢頒諭旨禁購食鴉片並定查禁章程然偷漏不絕道光（宣宗年號）初元歲銷益鉅乃重申禁令凡洋舶至粵者須先由行商出具並無夾帶鴉片結始准開艙如違例夾帶事發加倍治罪凡三次嚴旨禁止期盡絕根株

〔禁之無效〕時吏治敗壞蠹隸奸商因緣爲奸政府命令幾同虛具初時鴉片盡船泊澳門嗣盡徙匿零丁洋（在廣東之廣州灣內有內零丁外零丁之分）其

水路四通八達閩浙天津之商船咸就此私行貿易宣宗命粵督阮元查辦又移匿急水門金星門等地（均在零丁洋附近）銷行愈廣

〔林則徐〕福建侯官縣人以進士歷官至總督

〔痛言鴉片之害〕先是御史朱成烈鴻臚卿黃爵滋均請禁鴉片塞漏卮宣宗旨下中外議皆主禁時則徐爲兩湖總督言尤剴切大意見本文

〔焚鴉片〕宣宗以則徐爲欽差大臣赴粵查禁鴉片則徐飭兵圍英領事義律館令將鴉片掃數呈繳義律不得已聽命則徐會同兩廣總督鄧廷楨在虎門海灘高處監視銷燬各國士商皆服則徐之辦事精細或作文以頌之焉

〔並令永遠毋得售鴉片〕則徐爲永絕後患計請政府設專條凡洋人以鴉片入口圖買者分別首從處以斬絞又布告各國凡商船入口皆須具結夾帶鴉片船貨沒官人正法

〔英兵攻粵不勝〕時葡美等國之通商中國者各繳結如則徐所布告獨義律不允初以軍艦迫九龍（在廣東新安縣南）嗣介葡人轉圜願刪人正法一條則徐得宣宗旨戒其畏葸遂堅執不稍讓而政府復有絕英互市之通告於是英

政府乃決戰、調集海陸兵集澳門附近、時則徐已大治軍備、聲勢甚壯、發火舟十艘、乘風潮攻英艦、焚其船二十三艘、

〔迭擾沿海二旬〕英人見廣東有備、乃改犯浙東、襲陷定海、嗣陷鎮海、寧波、乍浦、（皆在浙江）又陷江蘇之寶山、上海、鎮江、直隸江寧、

〔宣宗斥林則徐〕當定海陷時、則徐爲忌者所中、褫職戍伊犁、

〔遣使議和〕當江寧見迫時、宣宗命耆英等議和、是爲南京條約、計要項八則、一、中英兩國、將來當維持平和、二、中國政府、向英政府納軍費一千二百萬元、商欠三百萬元、鴉片賠償六百萬元、限三年內繳清、三、開五口（詳本文）許英人通商及居住、四、以香港之主權、讓與英政府、五、放還英俘、六、戰役中爲英軍服役之華人、一律免罪、七、將來兩國往復之文書、用平行款式、八、條約得清帝批准、償兵費滿六百萬元後、英軍當撤去、佔據長江沿岸之兵、約既定、於鴉片禁賣問題、竟未提及、一時談國際者、咸怪政府之怯、及外交之無狀云、

第十一 英法聯軍之役

本文


中國雖與英人結和約、然彼此猜嫌未絕、宣宗子文宗時、廣東官吏至英

船捕罪徒、拔其旗、英人以爲辱、會廣西有法教士被害、英法二國、乃聯軍入廣東、總督葉名琛不設備、英人虜名琛、囚之於印度、英法舟師更北進、至天津、文宗遣使議和、約成而中變、兩國之師、遂陷北京、焚圓明園、文宗奔熱河、遣其弟奕訢求和、俄公使調停其間、和約始定、先是俄人迫改尼布楚條約、割據黑龍江以北之地、及調停有功、清廷復割烏蘇里江以東數千里界之、中國東北之邊境遂蹙、

準備

一 寫英法聯軍由天津上陸九大字於黑板、隨告之曰、此吾國國恥莫大之紀念圖、吾神聖不可侵犯之京師、外國軍人、從未涉跡其間、其涉跡實自是役始、天津者、京師之門戶也、英法聯軍於此上陸、其列桅甚

英法聯軍由天津上陸



高上懸國旗者、軍艦也不列桅、僅恃艙而行者、杉板船也、其軍人由指揮者舉刀前導、各肩槍以隨之、汝曹對於此圖、不可不知國恥、不可不引同身恥、

二 汝曹須知此役、不獨對於交戰國受損失、且對於並不交戰、爲戰事居間調停之國、亦大受損失、汝曹知此國爲何國、因書俄字於黑板、示之曰、卽當時清政府所最倚賴之俄國是、

教授事項

(甲) 時間分配 本課以一時授完、

(乙) 內容提示

- 一 於葉名琛之見虜、一方面當責名琛之無恥、一方面當以名琛之受辱、引爲通國國民之恥、
- 二 於圓明園之見焚、文宗之出奔、一方面當責文宗之無恥、一方面當以文宗之受辱、引爲通國國民之恥、
- 三 中國倚俄使作調人、不意調人卽爲嚮吾土地之屠創、足爲倚賴外人之前鑑、足令國民破除倚賴、發起自強之決心、

參考

〔文宗〕名奕訢、宣宗第四子、在位十一年、

〔拔旗英船〕先是廣州雖以南京條約、開爲通商場、而粵人峻阻洋人入城、屢致交涉、英將巴夏禮、方在香港日夜練兵、中國水師千總某巡粵河、遇一划艇、張英國旗、千總知奸民慣借英旗以自護也、登艇大索、執東莞逸匪、(東莞縣會匪曾圍廣州爲按察使沈葆輝所擊退) 十三人、拔其旗、以獲匪報粵督、

〔英人以爲辱〕西洋通例、以下旗爲大辱、巴夏禮馳與千總爭論、千總弗爲禮、巴夏禮大恚、以毀旗非禮、照會粵督、深致譴責、

〔法教士被害〕咸豐六年、廣西地方有戕殺法國牧師事、法求償未得、

〔英法聯軍入廣東〕先是巴夏禮嘗攻陷廣州、未幾、以兵少退去、粵民縱火洋樓、不問誰某、英法美商館、皆被摧壞、巴夏禮因告知英廷、英廷通告美法俄等國、欲與合攻中國、俄美皆不願、惟法帝拿破崙第三好遠略、以前此教士被害於廣西爲辭、與英聯盟、遂以咸豐七年、率聯軍向廣東、

〔葉名琛〕湖北漢陽人、(本江寧人世商於漢陽、遂爲漢陽人) 初爲廣東巡撫、以

粵人阻洋人入城、與英使重定約、爲宣宗所嘉、封一等男、咸豐二年、升兩廣總督、

〔名琛不設備〕名琛性木強、凡遇中外交涉事、意存慢忽、每接文書、輒略書數字答之、或竟不答、顧其術止於是、一切國情隣誼皆不審、英人以入城之約、爲粵人所阻、陰銜名琛、迨聯軍東來、將軍巡撫司道進見、商戰守策、名琛澹若無事、又迷信仙乩、軍機進止咸取決、乩語謂過十五日必無事、時咸豐七年十一月也、英法軍遂以是月十四日陷廣州、

〔名琛囚印度〕廣州既陷、巡撫柏貴、遺粵紳見名琛謀議和、名琛仍以斷不許進城五字語之、然一無戰備、爲英人劫上軍艦、挾至香港、猶日作書畫以應洋人之請、已而挾至印度之孟加拉、(印度東北部)羈禁之、名琛猶賦詩見志、日誦道家經卷不輟、尋以病死、

〔天津之役〕廣州之陷也、英法俄美、咸以增改商約爲目的、同發上海、抵天津、集白河口、投書述意見、

〔文宗遣使議和〕先遣侍郎崇綸、英法阻不見、攻陷大沽口礮臺、俄美調停、改派

大學士桂良等議款計重要者三事、一增開牛莊(奉天境)登州(山東境)臺灣(舊屬福建)潮州瓊州(廣東境)等處爲通商場、自漢口至上海俟太平事(見後文)定後、任擇三口爲商埠、二洋人所攜眷屬、可在京常川居住、三賠商虧及軍費銀四百萬兩、此外則修改稅則允准傳教等事、

〔約成中變〕約成於咸豐八年、聯軍退至上海議稅則、至明年夏、各國艦隊赴天津、遵例換約、直督通知各艦、請改道由北塘口進、英艦不從、直入大沽、爲中國軍擊破數艦、敗至香港、迨明年夏、復聯法軍、由北塘口進兵、陷天津北京隨陷、〔焚圓明園〕園在北京西郊外、爲清帝燕居之所、珍奇山積、當天津陷後、文宗遣載垣赴通州議和、載垣以英參贊巴夏禮辭色驕蹇、深怒之、設計擒之、解京、革人大憤、京城被攻時、園被火、既入城、見與巴夏禮同囚者、已斃十餘人、復火園、凡三日夜不絕、

〔奔訴〕宣宗第六子、文宗出走、命爲議和全權大臣、

〔俄使之調停〕京城陷時、奔訴避居城外、英法公使召之議和、奔訴恐入城見辱、俄使伊洛那替業福、因居間作調人、以禮部衙門、接近俄使館、保奔訴無恙、因

於其地定約章

〔和約之定〕除八年原定條件外，加關天津爲商埠，償英國銀一千二百萬兩，法國銀六百萬兩。

〔割地於俄〕俄使索厚酬於中國，續訂條約，時咸豐十年也。先是八年頃，俄使木喇福岳福與中使奕山訂愛琿條約，已將黑龍江北岸地讓俄，及是併庫頁全島暨烏蘇里江東地割讓，俄人遂於其地建阿穆爾省及沿海省。

第十二 太平天國

本文 宣宗末年，兩廣大饑，民多爲盜，官吏不能制，於是洪秀全起於廣西之金田，秀全，花縣^{在廣東}人，奉上帝教，自稱上帝次子，以耶穌爲天兄，傳教於廣西，黨徒日衆，遂舉兵，進據永安，稱天王，建號太平天國。時在民國紀元前六十一年，即清文宗元年也。清廷迭遣大臣往廣西督師，皆不能勝，秀全遂入湖南，取武昌，沿江東下，直入南京，以爲國都，號曰天京。秀全起兵之初，志在救民，及得意，驕怠，諸將又爭權相殺，是時曾國藩練勇於湖南，出攻太平之軍，相持逾十年，卒取南京，秀全仰藥死。時在文宗子穆宗之世矣。秀全建號凡十五年，所下六百餘

城，響應徧於全國，徒以建設無術，終至覆亡，
準備

一 問前清時代，以政治不良，致人民起而反抗者，汝曹試舉已讀之歷史證之，其數有幾，答白蓮教及天理教，今有宗旨較白蓮天理爲正，事業亦較彼等爲優者，當爲汝曹述之。（因書太平天國四字於黑板）

二 懸民國輿圖一幅，指南京以發問曰：我國古代之建都是土者，汝曹試舉已讀之歷史證之，其數有幾，答三國時之吳。（見第一冊第十九課參考內平吳條）及東晉南北朝時之南朝及有明，今有繼續明代建都於是者，即太平天國是。（因書天京二字於黑板）

三 懸歷代統系圖一幅，指問曰：汝曹試觀此圖，有太平天國之位置在乎，答無，其所以不能占一位置者何故，因書建設無術四字於黑板，告之曰：即此故。

教授事項

（甲）時間分配 本課分二時。

第一時 宣宗末年至即清文宗元年也。

第二時 清廷迭遣大臣往廣西督師至終至覆亡

(乙) 內容提示

- 一 於飢民爲盜、見當時官吏牧民之無術、於不能制盜、見當時官吏補救之無方、食國民之祿、不能忠國民之事、此種官吏、卽國賊、卽民賊。
- 二 於秀全之自稱上帝次子、見其誣世惑民、實與白蓮天理兩教無異、惟志在救民、則爲太平天國之榮譽、不可不爲之區別。
- 三 於秀全之中途驕怠、及諸將之爭權相殺、遂致有破壞而無建設、終底滅亡、則驕怠及爭權、當永懸爲國民之厲禁。

參考

〔民多爲盜〕宣宗時吏治日非、民生凋敝、兩廣以道光二十七年荒歉、流亡相屬、會湖南豪民雷再浩至粵境、擾廣西各郡、嗣是則李沅發、陳亞發、歐祖潤、山猪箭、顏品珪等、各率黨羽、分掠八方、羅單德、梁懷本、尤雄、結兄弟數千、與大頭羊、大鯉魚(均盜首名)合、數難清軍、其他未著名頭目、凡數十人、建白布爲大旗、上書官迫民變、或天厭滿清字樣、號召遠近。

〔官吏不能制〕時地方文武、恬嬉日久、皆庸懦無能、廣西巡撫鄭祖琛、尤老病憊事、雖檄所司緝捕、盜不稍戢、且加熾焉。

〔洪秀全〕以嘉慶十七年生於花縣、早孤力學、治春秋漢書、性豪邁、流寓四方、結同志、嘗以賣卜游江湖間。

〔起於金田〕秀全輾轉至廣西、居桂平(今潯州府)武宣二縣交界鵬化深山中、其徒楊秀清、蕭朝貴等、以道光三十一年、迎秀全至金田村、(在桂平境)置備馬匹旗幟器械、遂起兵。

〔奉上帝教〕上帝教爲廣東人朱九濤所倡、秀全及同邑馮雲山等師事之、九濤死、其徒遂公推秀全爲教主。

〔自稱上帝次子〕一句、秀全陰蓄大志、思藉教力以聚徒衆、慮九濤所傳教術、不足堅人信、成大事、乃託知名西教、自撰天父名目、稱天父名耶和華、謂耶穌爲其長子、已爲次子、於是尊耶穌曰天兄。

〔傳教於廣西〕秀全之居鵬化深山也、與馮雲山密傳上帝教、初某鄉議設保良攻匪會、秀全雲山因在會講教、大肆運動、於是楊秀清、蕭朝貴、石達開、韋昌輝

諸豪傑同爲信徒，秀全又以病危忽愈，謠言能先知，舉世將罹大災害，惟奉教拜上帝或爲教主起兵者，可全性命，死後升天，入極樂世界，蓋於教旨中植革命基礎云。

〔據永安〕秀全以咸豐元年閏八月攻克永安（今廣西永安縣）

〔稱天王二句〕秀全初發金田，抵大黃江，受衆推爲太平王，及據永安，建國號，復受衆推爲天王。

〔清遣大臣督師不勝〕清奪鄭祖琛職，起林則徐爲欽差大臣，道卒，李星沅代之，星沅與桂撫周天爵不相能，遣賽尚阿視師，均未能制勝。

〔秀全入湖南二句〕秀全之在永安也，清軍以數十營圍之，閱四月不能破，秀全潰圍趨桂林（故爲廣西省治），復由桂林趨長沙（今湖南省治），桂林以向榮馳援，長沙以江忠源力救，兩人爲當時清軍健將，故未下，秀全乃改趨岳州（今湖南岳州府），岳州文武已先期遁，得吳三桂所遺軍械，燬位，遂率民舟五千而東，下武昌（今湖北省治）。

〔沿江東下四句〕秀全用歸安（今浙江吳興縣）錢江策，連舟萬餘，順流東指，連

下九江（今江西九江府）安慶（今安徽省治）太平（安徽當塗縣）蕪湖（今安徽蕪湖縣），遂迫南京，南京城堅，爲各省冠，太平將石達開鑿地道於聚寶儀鳳二門，以地雷轟裂之，遂入城，將北向取河南爲都城，既乃定都南京，更名天京。

〔起兵初志〕秀全在金田時，禁搶掠，法律嚴整，行軍有規度，以弔民伐罪爲辭，其列將出示安民，有言天下貪官，甚於強盜，衙門猾吏，無異虎狼，今將救民於水火云云，比都南京，其民政取男女平權，開科分男女兩榜，嚴禁販鬻婢僕，畜妾賣娼，及婦人纏足，前清弊政，一時頗有廓除之氣象焉。

〔諸將爭權相殺〕秀全封王諸將，東王楊秀清頗專權，嘗以擊敗清軍開賀宴，秀清部下皆呼秀清萬歲，秀全目秀清謂弟將何以處我，秀清曰：弟爲萬歲，兄爲萬萬歲，秀全默然，旋使北王韋昌輝刺秀清，已而又殺昌輝，翼王石達開忿而出走。

〔曾國藩〕湖南湘鄉人，太平兵起，國藩以侍郎丁憂在籍，後歷官總督，授大學士，〔練勇於湖南〕國藩奉清廷命，治團練於長沙，總統諸軍，改編營制，以五百人爲

一營統以營官、自兩營迄十營數十營、視材之大小而設統領焉、時兵制久壞、旗綠營皆不堪用、國藩起、屏滑弁游卒不用、專選土人、領山農、但求精不務多、以故清軍漸起色、

〔出攻太平之軍三句〕國藩善延納、門下多賢將帥、如左宗棠、李鴻章、彭玉麟等、及其弟曾國荃、均以戰功顯、就中屢蹶屢起、自咸豐三年、迄同治（穆宗年號）三年、爲時十二年、與太平相持、卒由國藩弟國荃以地雷轟破南京城、

〔秀全仰藥死〕南京被圍時、援絕餉盡、秀全見大事已去、仰藥死、

〔穆宗〕名載淳、在位十三年、

〔秀全建號十五年〕起道光三十年、以教主名號舉兵、次年爲太平王、爲天王、迄同治三年、先後共十五年、

〔建設無術終至滅亡〕秀全都南京、委政於楊秀清、後殺秀清、以洪仁玕執政、秀全不復顧國事、惟務奢淫、內政外交、尤多失當、如官制之荒誕、刑罰之殘暴、不能禁止將士殺掠、以致所過爲墟、外國宣教師、始甚屬望於秀全、後至南京觀察、返而宣言太平天國、實無可冀其有爲、用是中外失望、上下離心、身死國滅、

第十三 新疆之役

本文

太平之起也、山東皖北之捻、陝西雲南之回、同時并起、與太平相應、太平既亡、回捻以次皆平、惟新疆遂獨立、穆宗使左宗棠往定之、新疆之獨立、浩罕人助之也、浩罕在新疆之西、其酋方與俄羅斯構兵、勢不能敵、至是、覬得新疆、以援助回民爲辭、遣阿古柏率兵入新疆、阿古柏自立爲汗、專權自恣、回族皆忿、然英人欲藉以禦俄、請中國許其獨立、左宗棠嚴拒之、卒出師、平定新疆、自文宗以來、新疆西北邊地數千里、悉爲俄羅斯所侵據、新疆之亂、俄人進據伊犁、至是、遣使索伊犁於俄、俄歸地無幾、乃改命曾國藩之子紀澤、赴俄力爭、始得伊犁以歸、因建新疆爲行省、

準備

一 問洪秀全之發起太平天國、其初志如何、答志在救民、今有與太平同時并起、遙相應和、使人民有塗炭之苦者、則捻及回是也、（因書捻回二字於黑板）
二 問我國國勢、利全土統一乎、利各地獨立乎、答利全土統一、不利各地獨立、今有冥頑之徒、藉辭獨立、以擾全局之治安者、當以何法對待之、答當以兵力

統一之、然則爲汝曹言以兵力統一之左宗棠（因書左宗棠三字於黑板）
教授事項

（甲）時間分配 本課以一時授完

（乙）內容提示

一 於新疆之獨立、一起內國之戰爭、二來外國之覬覦、見同在一國、當永爲兄弟以圖幸福、不當藐抗中央、致召種種之禍患、

二 以曾紀澤之爭回伊犁、見當時外交界之尙爲得人、然外交以武力爲後盾、有左宗棠耀武於前、乃有曾紀澤收功於後、故國民不可不栽培內界之實力、

參考

〔皖北〕安徽省一稱皖省、以皖山橫亘境內得名、皖北爲安徽省之北境、卽廬州（今合肥等五縣）鳳陽（今鳳陽等七縣）潁州（今阜陽等七縣）三府和（今和縣等二縣）滁（今滁縣等三縣）六安（今六安等三縣）泗（今泗縣等四縣）泗州地、

〔山東皖北之捻〕捻子一名撚子、因其明火剽掠、撚紙燃脂、故謂之撚、咸豐二年

頃、山東捻掠海州（今江蘇東海縣）安徽捻掠鹿邑（今河南鹿邑縣）寧陵（今河南寧陵縣）其後勢日猖獗、蹂躪至七八省、

〔陝西雲南之回〕回教徒雜居內地、始於唐、盛於元、與土著氣類、每不相合、地方有司、又不能持法律之平、遇仇殺事件、多爲左右袒、往往以小故致大變、咸豐五年、雲南回杜文秀起蒙化（今雲南蒙化廳）據大理（今雲南大理府）同治元年、陝西回與漢民構釁、乘機起事、圍同州（今陝西同州府）犯西安（今陝西省治）其後蔓延寢廣、甘肅回亦響應、

〔平捻〕太平既亡、其餘黨與捻合、往來飄忽、勢同流寇、曾國藩倡圍制之法、於江蘇安徽山東河南要地駐重兵、以有定之兵擊無定之寇、於是捻分東西、東捻爲李鴻章軍所平、西捻爲左宗棠李鴻章曾國藩等軍所平、

〔平回〕陝西回初經多隆阿擊敗、後以雲南回竄入故、多隆阿以傷重卒於軍、勢復熾、經左宗棠督軍痛勦、竄入甘肅、宗棠復督諸軍殄滅之、雲南回戕殺總督潘鐸、巡撫鄧爾恆、經岑毓英督楊玉科馬如龍等軍擊平、

〔左宗棠〕湖南湘陰人、少負奇氣、有大志、爲曾國藩所保薦、歷官總督、授大學士、

〔浩罕〕國名、在今新疆疏勒縣西北八百八十里、一作敖汗、

〔新疆獨立之歷史〕新疆於陝回倡亂時、阿渾安明、襲據天山北路、自稱清真王、惟喀什噶爾（今疏勒縣）回衆不服、遣人告浩罕、（浩罕國情詳本文）浩罕以阿古柏爲將軍、擁張格爾後人布蘇洛、新疆回人、以布蘇洛爲教主聖裔、爭附之、布蘇洛昏於酒色、爲阿古柏所逐、又擊走阿渾安明、制有北路回衆、阿古柏因自立爲汗、懼回衆不服、將北路漢回調駐南路、通使英俄、乞公認其爲獨立國、英使威妥瑪固爲之請於清廷、

〔左宗棠嚴拒獨立〕時廷議棄南八城、封阿古柏、宗棠上疏、力陳其不可、

〔出師定新疆〕宗棠督諸軍出關、且撫且戰、收復各城、阿古柏夙遇纏（纏頭之回卽南八城之土著也）回（不纏頭之回俗稱漢回以衣冠與漢人同也）新疆北路及內地之回皆是）虐、怨毒中人深、及是勢已衰、人人思報復、阿古柏仰藥而死、諸城悉降、

〔俄佔新疆邊地〕康熙時中俄定界、中國常住卡倫外、有哈薩克布魯特烏梁海諸部游牧、均羈屬於中國、其外復有甌脫地、遠或千里、近每百里、兩無所屬、咸

豐十年、俄人重修條約、始以常住卡倫爲界、清以太平事起、未暇較、而甌脫地延袤五千里、及哈布諸部、悉爲所侵、伊犁塔爾巴哈台、遂與俄偪處、

〔俄據伊犁〕阿渾安明既倡亂、俄遂乘間入伊犁、託言代中國收復、俟新疆定卽交還、

〔歸地之爭執〕左宗棠既復新疆各城、軍威大振、會清廷遣崇厚使俄、擅與俄定約、償俄金二百八十萬、劃伊犁西界南界之地予俄、朝議大譁、宗棠上疏抗爭、自請出屯哈密（今新疆哈密廳）令劉錦棠張曜各軍、分屯要隘、

〔曾紀澤〕國藩長子、任英法意比公使、

〔爭回伊犁〕清命紀澤由英赴俄、時俄增伊犁戍兵、又遣兵船游弋海上、冀震撼北京、乃一方召左宗棠入軍機、以劉錦棠督關外軍務、曾國荃李鴻章等守海防、一方由紀澤與俄人力爭、嗣由彼此讓步、改訂約章、伊犁復爲中國有、

〔建新疆爲行省〕清高宗定新疆、設將軍都統等官、用邊地制度、及穆宗時鑒於地方之多故、及交涉之困難、乃視同內地、設巡撫焉、

第十四 中法之戰

本文

安南自清高宗後，事中國恭謹，太平之亡也，餘黨多入安南北部，勢力甚強，而南部則爲法蘭西人所蠶食。法人欲吞併安南，兵力驍駿北上，與太平餘黨相爭，時清穆宗之弟德宗在位，欲保護外藩，命雲南廣西之軍出駐關外，助太平餘黨以抗法人，中法二國遂開戰。法以海軍攻臺灣，擾福州寧波，敗中國艦隊，惟陸師互有勝負，遂與法和，以安南歸於法，當是時，緬甸亦爲英所滅，中國失兩大藩，雲南廣西與強隣接境，邊地多爲所侵削，

準備

- 一 懸世界輿圖一幅，指語之曰：此何地耶？此非法屬安南耶？此何地耶？此非英領緬甸耶？然而安南本非法屬，乃中國屬也，緬甸亦非英領，乃中國領也，今將與汝曹述前清時代失敗之歷史。
- 二 問前清時代之對於安南緬甸也，不嘗費幾許兵力，幾許財力，而後收爲藩屬乎？答曰：然，以費幾許兵力，幾許財力，所得之藩屬，乃不加以經營，自棄其上，國主權於不顧，以爲可以省事，卒致事不可省，而禍乃踵來，謂予不信，請觀中法之戰（因書中法之戰四字於黑板）。

三 問汝曹所居之宅，不有門戶乎？曰：然，門戶以外，不又嘗有藩籬者乎？曰：然，何以需門戶？曰：以衛內宅，何以設藩籬？曰：以固門戶，汝曹知此，卽知清失外藩之失策，今爲汝曹縷述之。

教授事項

（甲）時間分配 本課分二時

第一時 安南自清高宗後至中法二國遂開戰

第二時 法以海軍攻臺灣至邊地多爲所侵削

（乙）內容提示

一 於安南事中國之恭謹，及安南南部之爲法人所蠶食，見中國當時之不知愛護安南，安南爲中國外藩，不知愛護外藩，其禍不止在外藩，卽爲主國之禍本。

二 於緬甸之爲英所滅，曾未與英開嚴重之交涉，較之安南之失，尤爲無狀，愈見當時政府之畏葸。

參考

〔安南事中國之恭謹〕安南王阮光平於高宗時受封（見本冊第五課參考內經略安南條）迨仁宗時阮福映（世爲廣南王領安南南部爲阮文惠所滅福映逃暹羅）起兵攻殺光平之子弘瑞代有其國申告於清乞以南越名國仁宗改封爲越南王貢獻惟謹每嗣王卽位均由中國冊封

〔太平餘黨在安南之勢力〕中國廣西南境與安南界穆宗時太平軍爲清軍所迫竄入安南邊境其長曰吳棍侵入東京勢甚熾安南不能拒乞師中國擊破之已而吳棍軍分兩黨曰黑旗軍曰黃旗軍黑旗推劉永福爲首永福有膽識招賢訓士卒占領興化省（東京之西）一帶地方其軍皆勇悍躡山起壑捷如猿猴以勁旅稱

〔南部爲法人所蠶食〕阮福映之王有安南也借法人之力爲多顧深防法人戒子孫勿割地法人恨之咸豐九年法軍陷西貢（今法國總督所駐地）安南請和越三年約成割西貢於法南部全境（一稱下交趾）漸次歸法領

〔法人及太平餘黨之爭〕清光緒（德宗年號）八年法將李威利率軍至安南迫東京安南守將藉黑旗兵力抗之李威利奮勇前擊遂佔東京劉永福憤甚悉

銳攻復之一時黑旗善戰之名紛傳中外安南王遂決意親中國以敵法然法兵日增遂進陷山西（山西爲東京城堡中最堅之城）

〔德宗〕名載湉穆宗從弟穆宗卒無子因嗣立在位三十四年

〔中法之開戰〕當法之攻山西也清廷亦發兵至安南兵敗退至北寧（山西之東）至次年（光緒九年）法將布里耳率兵陷北寧直至諒山（北寧東北與中國廣西龍州爲界）盡破之遂與安南立約以東京讓法自是安南爲法保護國其艦長之在天津者又與李鴻章定約允廢去中國之安南上國權旋以法軍收諒山爲中國軍所破法政府因責中政府背約戰端復啟

〔臺灣之戰〕法政府以利議不成派艦隊至基隆（在臺灣北部）致書守將令於二十時內將基隆讓出守將置不答遂擊其礮臺佔據之時督辦臺防劉銘傳聞礮擊基隆大怒率兵從法軍背後進擊彈掠面而過劉大言曰人自尋彈丸耳彈丸決不能尋人人苟存忠憤心丸自避士卒聞之奮攻法軍法軍遁〔擾福州〕法以海軍寇福州（今福建閩侯府）張佩綸時辦閩防不設備法艦隊突發礮進攻兵輪礮壘盡爲法破

〔擾寧波〕法又轉寇寧波、（今浙江鄞縣）浙提督歐陽利見禦之、礮傷法艦二、〔陸師互有勝負〕法陸師連捷、突入鎮南關、（今廣西憑祥縣南）守將楊玉科戰歿、已而馮子材率兵至鎮南關、奮擊大破之、乘勝追至諒山、軍威大振、安南人民靡然響應、子材有掃蕩東京全境之志、期率全軍薄北寧、

〔中法之和約〕時法國對於安南戰事、輿論不一、兵餉奇絀、曾紀澤以電達政府、馮子材又有願限一年復安南疏、然政府許法使巴特納之請、以安南爲法領、令子材棄諒山諸城還、

〔緬甸亦爲英所滅〕緬甸自清高宗後、額貢罔缺、惟與英人屢以印度界務起交涉、中政府絕未過問、至光緒十一年、緬京爲英所破、緬王被虜、中政府與英抗議、英人許代其貢、事遂寢、

〔安南緬甸失後之邊地〕英法得緬甸安南後、迭與我國議界、我國初索大金沙江（伊拉瓦第河）爲公共航路、英人不從、而許以江洪（即車里）等地歸中國、迨中日戰後、我國以江洪南部割讓於法、英人不悅、亦割我雲南西南邊地、進兵野人山、迭次與滇吏議劃野人山界、每議一次、則侵佔益深、清之晚年英人

遂據片馬、至今不退、駸駸進向川藏矣、綜計雲南西南部之邊地、失之於英、法者、不止數千里也、矧法國鐵路、進據滇疆、英人亦欲進築、尤爲腹心之憂乎、


第十五 中日之戰

本文 中法戰後、清廷命李鴻章組織北洋艦隊、改臺灣爲行省、以爲亡羊補牢之計、乃僅越十年、而又有中日之戰、日本當穆宗時、即變法以圖自強、既滅琉球、又窺朝鮮、欲盡翦中國之東藩、會朝鮮內亂、中國遣兵往定之、日本亦出師、大敗中國之兵、遂據朝鮮、進攻奉天、取旅順、北洋艦隊殲焉、德宗乃命李鴻章赴日本乞和、許朝鮮爲獨立國、并償兵費、割臺灣、戰事始已、當是時、中國之衰弱、已爲列強所洞見、瓜分之議遂起、德國首以兵據膠州灣、迫政府租讓、以九十九年爲期、於是俄人租旅順、英人租威海衛、法人租廣州灣、紛紛要索、國勢極危迫、美人懼列強競爭、將擾世界之和平、提議開放門戶、保全領土、列強從之、瓜分之說稍息、

準備

一 畫清季疆域圖於黑板、隨語之曰、汝輩不嘗閱清之疆域圖乎、然其季世、則

清季疆域圖



非前比矣、對於內國一方面、則東北界線、已縮入幾許、臺灣亦非我有、能不爲之痛心乎、對於外國一方面、則東服之朝鮮、歸日領矣、南服之安南之緬甸、分歸法英兩國有矣、不更爲之痛心乎、奉天南部之旅順租於日、旅順對面之威海衛租於英、威海衛南之膠州灣租於德、廣東西部之廣州灣租於法、廣州灣東北之香港佔於英、至如廈門、福州、寧波、上海、南京、廣州、均爲外人迫開之商埠、凡此皆吾國之民所當引爲大恥者也、

二 懸日本輿圖與中國輿圖相比較、問之曰、中國與日本孰大、答中國大、日本小、然而中國以不能自強而弱、日本以能自強、遂爲亞東之雄國、汝曹亦知中日之戰乎、(因書中日之戰四字於黑板)

三 汝曹知日本之小於中國矣、抑知世界各國、其大於日本者正多乎、日本且恃強以陵我、則其他之大於日本者可知、言念及此、吾不能不深望吾國之自強、吾不能不與汝曹言中日之戰所受之影響、

教授事項

(甲)時間分配 本課分二時、

第一時 中法戰後至戰事始已

第二時 當是時至瓜分之說稍息

(乙) 內容提示

一 於中法戰後清廷之種種設備、見其頗知悔悟、惟有悔悟之心、未能於政治上教育上爲根本之解決、是以終歸於失敗、

二 於日本之戰勝中國、其根源在變法自強、所謂自強者、不僅屬政府言、當屬全國國民言、不僅屬軍事言、當屬學戰農戰工戰商戰一切事業言、其敗我也我之恥、欲雪此恥、常師其自強之道以自強、

三 於列強之交迫、見我國苟非自強、萬不能生存於世界、我國國民、萬不可不人人奮自強之熱心、以求達自強之目的、

參考

〔李鴻章〕安徽合肥人、歷官總督、授大學士、

〔組織北洋艦隊〕光緒二十一年、李鴻章奉命籌劃海防、於是有海軍之設、凡二十營、鐵艦快船二十餘艘、魚雷六營、魚雷艇六艘、以旅順及威海衛爲屯據之

軍港、設海軍提督及左右翼總兵以統之、而總其成於海軍衙門、

〔改臺灣爲行省〕先是聖祖時收臺灣入版圖、改置臺灣府、隸福建、迨中法事起、政府始知臺灣爲南洋門戶、宜有大員以資控制、乃援新疆改建行省例、將福建巡撫改爲臺灣巡撫、常川駐紮、以臺北爲省城、增設臺南府、並設布政使按察使等官以專責成云、

〔日本之自強〕日本自古爲君主專制國、中世後、大權均操諸幕府、及明治卽位、幕府歸政、改政體爲立憲政體、百務振興、對於軍國民教育、尤爲注重、遂爲亞東第一強國、

〔滅琉球〕琉球向爲中國屬國、合三十六島而成、事中國甚謹、同治初年、國王尙泰立、循例請中國冊封、光緒五年、日使強尙泰勿入貢中國、尙泰答以久爲中國藩封、世修貢職、不便擅自更張、後向中國告急、中國不能應、日人乃發兵執尙泰歸、夷琉球爲沖繩縣、

〔窺朝鮮〕朝鮮世爲我屬、同治初、李熙以冲齡踐位、其生父李是應執政、與法美日三國肇釁、三國以我爲上國、詰我政府、政府憚於交涉、以向不問其內政及

外交對日人利我政府之放棄也、乃遣使與朝鮮直接交涉、始以嚴辭責之、繼以甘辭誘之、因訂約、認朝鮮爲獨立國、開港通商、我政府不之問、於是日政府視朝鮮爲囊中物、陰謀日亟、

〔朝鮮內亂〕朝鮮王年少親政、權移后族閔氏、李是應陰激軍士、謀害閔族、日使館被焚、日人以兵入朝鮮京城、索償金、並留兵戍使館、中國亦遣軍至朝鮮、執李是應歸、於是中日兩國各駐兵朝鮮、時朝鮮分兩黨、一附日、一附中、附日黨刺殺政府大臣、入王宮、日使率兵應之、中國所遣委員袁世凱、聞變馳救、擊退日軍、匪黨盡散、日索償金於朝鮮、復遣使至中國、訂約於天津、兩國各撤所駐兵、嗣後欲派兵赴朝鮮、須兩相照會、顧未幾又有東學黨之亂、朝鮮王討之不能克、

〔中國遣兵〕時朝鮮來告急、我國因出兵平其亂、

〔日本出師〕日本聞我遣兵、急率海陸軍至朝鮮、惟東學黨已平、我國促日本撤兵、日本則迫朝鮮政府、促我撤兵、各執天津約爲辭、於是中日兵端啓、

〔日本大敗中國兵〕中日撤兵議久不決、日艦開礮擊我運兵船沈之、兩國因宣

戰、我海陸軍俱敗績、

〔據朝鮮〕日擊我軍於牙山、(朝鮮忠清道境)我軍退平壤、(朝鮮平安道首府)日兵力戰陷之、於是朝鮮無我軍駐紮地、遂爲日所據、

〔攻奉天取旅順〕旅順在遼東半島上、爲北洋最良軍港、平壤敗後、日軍乘勝銳進、渡鴨綠江、陷我遼東諸廳縣、遂攻陷旅順、

〔北洋艦隊被燬〕當日軍渡鴨綠江時、中國水師提督丁汝昌、率軍艦十二艘游弋江口、被沉者五艘、旅順既失、日以全力注威海衛、(在山東登州府東)丁汝昌以餘艦七艘守劉公島、(威海衛附近)爲日本所燬、於是奉天之營口、(在遼河左岸)臺灣之澎湖諸島、(臺灣之正西)相繼被陷、

〔李鴻章議和〕時政府大震、乃遣張蔭桓邵友濂赴日議和、日人不納、改遣李鴻章爲全權大臣、與日本伊藤博文會議、時光緒二十一年也、其要款詳本文、

〔償兵費〕二萬萬兩、

〔割臺灣〕原議割遼東半島及臺灣澎湖歸日本、俄人以日佔遼東、非俄國之福、乃聯合法德以爭之、日本不得已、讓還遼東、復得代價銀三千萬、惟當臺灣割

讓時、臺民大駭、請收成命不報、乃奉巡撫唐景崧爲總統、已而撫署兵變、景崧知事不可爲、匆匆東渡、劉永福時駐臺南、與其下謀拒日、兵敗亦退歸、於是臺灣竟爲日所有、

〔德租膠州灣〕膠州灣在山東膠州境內、海水突入、有東西二澳、亦海軍良港也、中日和約成、俄人以迫讓遼東索酬報、訂密約十一條、借膠州灣爲軍港、德人知之、因以銳敏手段、藉教士被戕爲名、突以軍艦佔住焉、強索爲租界、政府不得已許之、

〔俄租旅順〕膠州灣既爲德所佔、俄使憤甚、迫政府、訂約九條、租旅順爲西伯利亞鐵路通過滿州之終點、以二十五年爲期、沿路許俄兵駐護、

〔英租威海衛〕俄得旅順、握東亞海權、爲英人所不利、乃持均勢說、強租威海衛以爲抵制、亦以二十五年爲期、

〔法租廣州灣〕廣州灣在廣州之西、吳川遂溪兩縣所屬、中多大洲、形勢天成、法人要求爲其南方海軍根據地、迫政府租讓、以九十九年爲期、

〔美人之和平提議〕美人向持孟祿主義、（孟祿爲美之總統）以保守美國固有

之領土不事侵略爲主義、（美人宗之）於中國無疆界之爭執、至是爲世界和平計、乃提議及此、其要款詳本文、

〔開放門戶〕言允准各國通商、由中國自行開放也、

〔保全領土〕懼他國侵略、礙及均勢之局、故以保全爲辭、

〔列強從之〕列強懼瓜分不均、致彼此爭戰、反牽動歐洲大局、故從美人之勸、改激烈競爭爲和平之競爭、

第十六 義和團

本文 國人見外患日急、漸奮勵、有自強之心、適康有爲梁啟超以新學名、一時附之者甚衆、德宗召見有爲等、引用其黨、決行變法、然內外大臣多不悅、孝欽后者、穆宗生母也、穆宗德宗始立時、皆年幼、孝欽后專政數十年、驕奢淫佚、至是復臨朝、幽德宗於瀛台、戮主議變法者、有爲等皆奔竄海外、孝欽后恨外人勢力日橫、又惡其庇護新黨也、乃獎用義和團、欲藉其力以懲外人、義和團本八卦教餘派、仁宗嚴禁之、至是大熾、其徒自謂有神術、不畏槍礮、自山東至直隸、延及北方各省、到處蜂起、而以載漪剛毅等爲之魁、焚教堂、戮公使、日夜攻使館、列國

遂起聯軍、直陷京師、孝欽后挈德宗
出走西安、誅貶王公大臣以謝、并償
銀四萬萬兩、與聯軍和、

準備

一 寫義和團之裝束六字於黑板、

指示之、曰此拳禍記（教會所撰）

義和團之裝束



中所繪之圖、首纏紅布、於衣之胸前繡三字、三即易經八卦中之坎卦也、手中
所持爲鋼叉、乃舊式兵器、戲劇中亦用以爲飛舞之具、吾國當時教育未遍及、
一般下流社會、通受戲劇教育之影響、故持此以示武、

二 問日本以何因緣而能自強、答以其變法、然變法匪難、實行爲難、今試述前
清時代變法之痛史、

三 問日本之所以能自強、恃神力乎、恃人力乎、答恃人力、今試述前清時代不
恃人力倚仗神力之怪史、

教授事項

（甲）時間分配 本課分二時

第一時 國人見外患日急、至有爲等皆奔竄海外

第二時 孝欽后恨外人勢力日橫、至與聯軍和

（乙）內容提示

一 於國人之有自強心、見吾國國魂之不死、是爲近日創建民國改造共和之
絕大原因、

二 於德宗之見幽、主議變法者之見戮、見當時專制之達於極點、啓內變、召外
釁、均此專制二字爲之厲階、

三 於孝欽后之倚仗義和團、義和團之倚仗神術、卒之團既罔效、神亦無靈、足
見自強之當出至誠、無所虛僞、

參考

〔康有爲〕廣東南海人、中日戰後、曾上萬言書、痛陳時政、

〔梁啓超〕廣東新會人、有爲之徒、有爲開強學會於京師、啓超與焉、以言論動一
時、

〔康梁之新學〕同光之間，西學初輸入中國，舉世學者，莫或過問，兩人原研舊學，迨閱繙譯書報，於政治哲學，頗資探討，遂以新學名。

〔附者甚衆〕時兩廣總督張之洞、德宗師傅翁同龢、兵部侍郎張蔭桓等，皆與兩人深契合，其餘在朝在野之人士，熱心時局者，亦多與往還焉。

〔德宗召見有爲等二句〕有爲所上萬言書，大爲德宗所激賞，嗣奉命極言大計，遂以光緒二十四年召見，有爲極言維新全局，及下手條理，德宗令隨時條陳，專摺奏事，於是梁啓超、楊深秀、劉光第、楊銳、林旭、譚嗣同，並有爲之弟康、廣仁等，同時並進，不次擢用。

〔決行變法〕德宗先下定國是詔，飭王公以及士庶，努力向上，發憤爲雄，於是開特科，廢八股，辦學堂，改兵制，革新詔書，月數十下。

〔中外大臣多不悅〕新法之行也，本爲中外官僚所不便，有爲又指六部則例，爲敗亡中國之根本，王大臣皆驚駭，又有嚴旨責各省將軍、省撫，疲玩因循，是時諭旨，類出嗣同等手擬，繼又裁汰同城巡撫及內外冗官，而官僚遂大起恐慌。

〔孝欽后〕姓那拉氏，文宗之妃，文宗卒，以子貴，尊爲皇太后，卒諡孝欽。

〔專政數十年〕穆宗立，年八歲，孝欽后與穆宗嫡母孝貞后，同垂簾聽政，孝貞靜穆，軍國事一由孝欽主持，迨同治十一年，穆宗親政，十三年卒，文宗弟弈譔之福晉（清時王妃名號）孝欽之妹也，孝欽因立其子載湉，是爲德宗，年五歲，孝欽復與孝貞同聽政，無何，孝貞卒，孝欽獨垂簾，迨光緒十五年始歸政，都計自同治元年至此，已專政二十有六年。

〔驕奢淫佚〕孝欽性狡獪，欺孝貞懦，孝貞不能制，日益縱恣，寵任內監，如安得海、李蓮英等皆是，安赴山東，招搖橫肆，巡撫丁寶楨執而戮之，李蓮英，寵任尤甚，終孝欽之身，貪賄弄權，營緣奔競者，日湊其門，爲政事腐敗之根本，孝欽又建頤和園，舉萬壽典禮，及種種奢費，羣臣有諷諫者，輒以離間宮庭嚴譴之，附會儒家以天下養之說，以逞其淫欲。

〔復臨朝〕孝欽之歸政也，歸政其名而專政其實，德宗擁帝位如虛器，及德宗毅然變法，爲羣臣所疾，因共奉孝欽復臨朝，託稱德宗有病。

〔幽德宗於瀛台〕瀛台在西苑太液池中，周圍環水，以橋達之，本爲夏日視政之所，至是既稱德宗有疾，遂居之於此，徵各省名醫爲診疾。

〔戮主議變法者〕孝欽謂康有爲等謀圍頤和園，下詔捕之，并其黨與，於是楊深秀、劉光第、楊銳、林旭、譚嗣同、康廣仁，均見戮於菜市。

〔有爲等奔竄海外〕時康有爲方赴上海辦官報，甫出京，孝欽閉城大索之，不獲。有爲已至天津，趁英輪南下，直督派兵艦追之，有爲至上海，將入口，英領事遣人告之，轉乘英兵輪至香港，其徒梁啟超亦於是時赴日本，二人箸書肆詆，孝欽無如何。

〔孝欽恨外人勢力日橫〕見前課。

〔惡外人庇新黨〕見本課參考內有爲等奔竄海外條。

〔義和團之歷史〕先是雍正時，不逞之徒，自號教師，演習拳棒，召誘徒衆，爲世宗所禁，迨嘉慶時，白蓮、天理兩教變起，同時有八卦教義和拳名目，其後又有義和門名目，均經仁宗先後飭拿，然根株終不能絕，本書所繪義和團裝束衣繡二字，卽八卦餘派之確證也。

〔其徒自謂有神術二句〕焚香念咒，咒絕俚鄙，長短不等，謂念畢卽有神附身，神絕荒唐，男子則孫行者，猪八戒之類，女子則樊梨花、劉金定之類，皆戲劇中所

常演者，謂有此類神來附，卽槍彈不能入，然斃於槍彈者纍纍，而愚民終不悟，卽有知其詐者，亦爲團黨所脅，不敢揭其覆幕，故愈聚愈衆云。

〔山東之團匪〕拳匪本起山東，其勢已盛，後因袁世凱爲山東巡撫，力勦之，其焰始息，而由山東轉入直隸之匪，則不可止遏矣。

〔直隸之團匪〕拳匪之入直隸也，拆鐵道電桿，燬教堂，殺教民，政府始猶下詔嚴勦，迨其黨轉入京師，趙舒翹、剛毅等爲之宣揚，於是爭以爲神拳，滿洲親貴及宮監宮女，多傳習者，匪勢遂大熾。

〔北方各省之團匪〕如山西、河南、東三省皆蔓延，山西巡撫毓賢尤信之，教民被害最慘。

〔載漪剛毅〕載漪，宣宗之孫，醇王奕詝之子，襲封端王，生子溥儀，孝欽既惡德宗，立溥儀爲大阿哥，繼穆宗之後，載漪用是得勢，迨團匪起，載漪力主之，遂爲團匪領袖，與外人爲難，而以剛毅、趙舒翹、董福祥等爲之爪牙焉。

〔戮公使〕德公使克林德，因往總理衙門，中途爲拳匪槍斃，又有日本公使之書記，亦爲軍人所殺。

「日夜攻使館」使館守兵不滿千，團匪圍攻之，凡經六十餘晝夜，猛攻五十有餘次，卒以槍礮之利，匪斃無算，而館不可破。

「聯軍陷京師」方匪徒之攻使館也，各國公使，各電其本國請兵，於是聯軍齊集大沽，以德將華德西爲統帥，陷天津，長驅入京，搜滅拳黨。

「孝欽西走」聯軍將入京時，孝欽懼，挾德宗出走，道中衣食不繼，至太原（今山西省治）始稍安，遂走西安（今陝西省治）。

「誅貶王公大臣謝各國」孝欽命李鴻章奕劻與各使議和，各使索罪魁，名指載漪、孝欽有難色，磋商久之始定，於是除徐桐裕祿剛毅先死外，毓賢、啓秀、徐承煜斬決，載勛英年趙舒翹賜自盡，曲宥載漪與公爵載瀾發新疆禁錮，其餘黜革有差。

第十七 日俄遼東之戰

本文 義和團起時，東三省亦響應，東三省鐵路爲俄人所築，俄人以保護爲辭，以兵據東三省諸要地，及列國聯軍入北京，清廷與列國議和，并請俄人撤東三省兵，俄欲以其地爲己有，遷延撤兵之期，且欲伸其勢力於朝鮮，朝鮮者，日

本奪之於中國，而不願他國染指者也，因與俄人議，欲以東三省歸俄，朝鮮歸日，各爲其勢力之範圍，俄人不從，兩國遂宣戰，以遼東爲戰場，劃遼河以西爲中國中立地，俄國海陸軍皆爲日本所敗，乃講和，以中國之旅順、大連灣及東三省南部之鐵路轉租於日本，并割庫頁島南部爲日本之地，而東三省北部鐵路及庫頁北部仍屬於俄，庫頁島者，本吾中國之地，清文宗割以與俄者也。

準備

一 懸東三省輿圖（或即全國輿圖）指示之曰：此三省者，非我國之領土耶？此蜿蜒曲折於我領土內者，非鐵路耶？然而領土則我之領土，鐵路則不盡我之鐵路，汝曹欲知此路之歷史乎？

二 問今有甲乙二人尋仇，當於何地決鬪？答不於甲地，即於乙地，設不於甲地乙地，而以汝曹共處之學校爲其決鬪之地點，汝曹許之乎？答否，何以故？答以學校地點爲本校主權故，然則前清時代，有不敢爭本國主權之痛史，汝曹知之乎？

教授事項

(甲)時間分配 本課以一時授完

(乙)內容提示

- 一 於俄人之強據東三省，以保護鐵路為藉口，見我國路權之不可外假。
- 二 於日俄之戰於遼東，遼東本我國土地，我國卻於是時守中立，此種中立，為不得已之中立，最可恥之中立。
- 三 於日之勝俄，得種種之權利，而我國損失無算，見立國於世界，非自強不足以禦外侮。

參考

〔東三省響應義和團〕當載漪當國時，傳檄各省，促殺逐外人，黑龍江將軍壽山應之，率兵攻哈爾濱。（今吉林濱江廳境，俄國東清鐵道通過處）並由愛琿（今黑龍江愛琿廳）入俄境。

〔東三省鐵路二句〕先是俄築西伯利亞鐵路，為通其遠東地方之樞紐，旋以黑龍江北岸，路工較難，與中國先後訂約，允其路穿入滿洲境內，直至哈爾濱，又分二支，一向東至海參威（本中國地方，今為俄屬沿海省之出海要口），一向

南至旅順口，此路概由俄興築，其管理權訂有期限，期滿准由中國收贖。

〔俄據東三省〕壽山兵之入俄境也，俄兵迎擊之，遂藉口保護鐵路，進兵陷齊齊哈爾（今龍江府）壽山自殺，俄軍大肆屠掠，復經吉林，入奉天，所過殘殺，時聯軍已陷山海關，關以外悉入俄掌握，俄置兵十八萬鎮壓之，並挾率吉兩將軍以號令所屬。

〔撤兵事之膠葛〕當北京和議成時，俄與中國訂立東三省撤兵約，計分三期，以六月為一期，首奉天，次吉林，次黑龍江，按期撤盡，第一撤兵期如約，第二撤兵期，俄遽派遠東總督，將前期所撤兵調回，並徵調海軍，以防列國之干涉，實行其殖民政策，至第三撤兵期，俄兵有增無減，有永佔東三省之勢焉。

〔俄欲伸勢力於朝鮮〕朝鮮於中日戰後，號稱獨立帝國，實受日人之制，朝鮮人因是不悅日本，陰倚俄，俄遂於朝鮮大擴張其勢力，日人危之，與俄協商，兩國在朝鮮所經營，各不相防，而俄人忽據朝鮮之龍巖浦（在平安北道西部）於是朝鮮事日棘。

〔日俄之戰端〕日政府以朝鮮問題，與俄政府協商數四，卒未就緒，俄欲據東三

省全部又欲佔朝鮮北部之利權、一方則急修戰備、一方則以議局周旋日人、日人見事機危急、爲先發制人之計、擊敗俄艦隊於仁川、(在朝鮮京城西)又敗之於旅順、於是兩國乃決戰、

〔以遼東爲戰場〕一句、日俄既宣戰、其交戰地域、屬於中國之領土、日政府因將中國應守中立原由、通告各國、各國公使、各奉其政府之訓令、通牒承認、中國政府、不得已受中立之勸告、劃定地點、嚴守中立界線、並飭各省督撫、均守局外之例、凡糧儲器械、不得私行接濟云、

〔俄軍之敗〕日以艦隊塞旅順口、俄兵不得出、俄屢遣兵來救、皆敗退、日陸軍復占據金州(今奉天金州府廳)各城、俄人屢敗、乃令其波羅的海艦隊、鼓行而東、行至對馬島、(在日本北海道西部海中)日禦之於海中、全隊燬焉、旅順被圍日久、戰壘盡失、遂出降、俄兵之在奉天境者、皆敗走、

〔日俄講和〕時俄在東方、已失其戰鬪力、美總統力勸兩國和、日以小村壽太郎爲全權大臣、俄以維特爲全權大臣、會議於朴子茅、(在美國大西洋北部紐罕什爾海口地方)其要款詳本文

〔東三省南部之鐵路〕自長春(今吉林長春府)以南至旅順口之鐵路、

〔轉租於日本〕旅順大連灣、原由中國租與俄、東三省南部之路線、原由中國租與俄築鐵路、現皆由俄轉租與日、並訂明須得中國之承諾、

〔庫頁島南部〕以北緯五十度爲日俄在島內之界線、

〔庫頁島歷史〕禹貢稱島夷皮服、地當冀州東北、庫頁一帶之島嶼均屬焉、蓋庫頁土人、皆衣魚皮、俗稱魚皮韃子、與禹貢皮服之說亦近也、明謂之苦兀、屬奴兒干都司、清謂之庫葉、爲吉林所屬、(清一統志清會典圖及水道提綱均載之或稱爲大洲或稱爲大長島即指此也)

第十八 預備立憲

本文 清室自妄信義和團、以致喪國權、重民困、已大失人民之心、迨日俄之戰、惴惴守中立、勢力之衰絀、益表著於世、於是國民不得不求自保之方、冀免滅國亡種之禍、而改革政體、傾覆皇室之議論遂熾、清廷爲收拾人心計、復行變法、義和團既敗、已注意興學練兵、及日俄戰罷、更遣特使出洋、考察政治、於是有預備立憲之詔、未幾、德宗及孝欽后、相繼卒、德宗弟載灃之子、入卽位、載灃爲監

國攝政王、是時、諮議局資政院、相繼立、又大改官制、以示實行憲政、然國事敗壞如故、事權悉歸親貴、且政出多門、賄賂公行、國民益失望、

準備

一 將世間所有政體之區別、開列於左、

(1) 君主專制政體

(2) 君主立憲政體

(3) 民主共和政體

二 將各政體所以然之區別、指告之曰、何謂君主專制、君主以無上之權、行一國之政、人民不得參預是也、何謂君主立憲、制定憲法、君民共守、事無大小、人民得以參預、而君權有限制是也、何謂民主共和、由人民選舉材德兼備者、俾爲大總統、定以年限、凡事皆決於衆、以公心行之是也、

三 吾曹今日爲民國國民、皆食共和之幸福矣、抑知前清時代、並君主立憲亦不可得乎、今與汝曹述前清預備立憲之事、

教授事項

(甲) 時間分配 本課以一時授完、

(乙) 內容提示

一 於國民力求自保、冀免滅亡、見國爲國民公有之國、必有自保之實力、乃無滅亡之後患、

二 於清末之預備立憲、而事權悉歸親貴、見其口是心非、遂爲清祚覆亡之大本、故國民任舉何項事業、皆當出以至誠、不可蹈口是心非之覆轍、

參考

〔喪國權〕如列國和議條件內、關繫主權之重要者凡四、一、懲辦罪魁、由列國要挾、二、兩年以內、禁輸入兵器彈藥、三、擴充公使館、館址所在之區、中國人不得居住、四、大沽礮臺、以阻京津間之交通、應行破毀、且自此之後、中國益爲外人所輕視、

〔重民困〕賠款四萬萬、由各省攤還、各省乃加抽稅捐、苛斂日重、人民食用騰貴、元氣大傷、慘於兵燹、

〔滅國亡種〕滅國、如朝鮮滅於日、安南滅於法之類、亡種、如美洲紅種、澳洲土人、

漸次銷滅之類其原由皆自國民不能自保始

〔清廷之復行變法〕自俄敗於日、世界各國咸知專制之不能持久、於是俄及暹羅波斯土耳其先後由專制政體改而為立憲政體、中國士民亦遂主張立憲、各省督撫咸以為言、清廷懼人心大去、乃藉變法以資收拾、

〔興學〕時直督袁世凱等奏請立停科舉、推廣學校、於是設管學大臣、設學部、各省設提學使、興辦各項學堂、

〔練兵〕先由練兵處奏辦新軍、嗣設陸軍部以總其大權、全國兵額約分三十六鎮、由各省設督練處、下設兵備參謀教練三處、軍分常備續備後備三種、並設陸軍中小學堂及兵官學堂以造將才、

〔遣特使出洋考察政治〕分遣載澤、戴鴻慈、端方、尙其亨、李盛鐸五人為考察政治大臣、赴東西洋考察、

〔預備立憲詔〕光緒三十二年、下詔預備立憲、內言大權統於朝廷、庶政公之輿論云云、越二年、又下九年籌備立憲詔、

〔德宗孝欽后相繼卒〕光緒三十四年十月、德宗卒、逾日、孝欽亦卒、

〔載灃之子〕名溥儀、是為宣統帝、在位三年、

〔諮議局〕各省設立、其議員由各地方選舉、為採取輿論之機關、即省議會基礎、〔資政院〕設於京師、其議員由欽選及各省諮議局議員互選、為上下議院基礎、

〔大改官制〕官制分京朝及地方兩部、京朝部向設大學士、及吏戶禮兵刑工六部、後改內閣、設總理一人、分外務民政度支陸軍海軍農工商郵傳理藩學法等部、每部設大臣一人、地方部除督撫外、原設布政按察兩使、後改按察使為提法使、增設提學使、又設巡警勸業等道、及高等初級審判廳、

〔事權悉歸親貴〕時內閣總理、為慶親王、奕劻、其餘海陸軍及度支理藩等部、概屬貴族、各省人士、以皇室內閣、非特不利民人、兼非皇室之福、抗爭再四、載灃以任用親貴、朝廷具有不得已之苦衷、飾辭拒諫、較之未變法以前、專制益甚、〔政出多門〕載灃雖攝政、然內制於孝定后（德宗之后）及其母福晉、而奕劻及載灃弟載洵、載濤、亦各恃勢驕恣、載灃周旋其間、頗形竭蹶、

〔賄賂公行〕時親貴之門、舉為鬻官賣爵之市場、奕劻等皆集資鉅萬、載灃知之、而不敢問、其弟洵、濤輩、亦招搖婪索無忌、

第十九 清帝退位

本文 各省諮議局及人民，以速開國會爲根本之圖，迭次請願於朝，朝議不許，民國紀元前一年，收商辦鐵路於國有，四川人民有不從者，戕殺無算，又遣重兵勦之，於是人心益離散，常是時，民黨密布南方，乘機舉事，八月十九日，發難於武昌，不二日，收復漢口漢陽，旬日之間，各處響應，全國大震，時清軍悉力攻漢口漢陽，取之，然東南各省，率爲民軍所得，北方諸省，亦羣起應和，清廷知民意所歸，勢難固拒，乃遣使南下，與民軍議和，久之議定，清帝退位，民軍亦報以優待之禮，並歲給四百萬金，爲皇室經費焉。

準備

- 一 懸歷代統系圖一，問自黃帝至宣統之末，共若干年，答共四千六百有餘年，（見第一冊第一課準備三）此若干年行何政體，答專制政體，專制政體以何時推翻，答宣統末年推翻，今爲汝曹述推翻時之歷史。
- 二 畫十九星旗一，（有則懸之）指示之曰，此爲中華民國開國之軍旗，即推翻專制政體之義旗，汝曹知首建此旗者何地，因大書武昌二字於黑板，告之曰，

卽此地。

- 三 復指星旗謂之曰，此推翻專制政體之義旗，雖建自武昌，至推翻專制政體之決心，則全國一致，故我中華民國，實我全國國民共同建造之民國，今爲汝曹述當時國民之公意。

教授事項

（甲）時間分配 本課分二時。

第一時 各省諮議局及人民至全國大震

第二時 時清軍悉力攻武昌漢陽至爲皇室經費焉

（乙）內容提示

- 一 於戕殺四川人民及派兵往勦，見專制政府之毫無法律，毫無人道。
- 二 於人心離散，見其爲民黨起義之大原，民黨爲全國謀幸福，全國皆民，卽不啻全國皆民黨。
- 三 於清廷知民意所歸，勢難固拒，見國民愛國之誠之效力，苟無此全般愛國之血誠，其效力必不能如是之大且速，故國民當永保此誠而弗懈。

四 於民軍優待退位之清帝見民軍純然爲仁義之師爲革命上最有榮譽之歷史

參考

〔要求速開國會〕先是載灃於義和團之亂充謝罪使赴德游歷各邦比監國正逢籌備憲政時期天下咸望其大有作爲顧左右牽制不能淬勵進行世變日亟各省人士乃斷指瀝血上國會請願書政府不予獎勵更陵辱之比再請三請愈接愈厲始不得已改九年立憲期爲五年嗣是上書請願者概置不理

〔鐵路國有〕載灃以盛宣懷長郵傳部宣懷上鐵路國有政策時外人覬我路權既日甚而各省商辦各路線財力頗絀人心復歧往往緩不及事政府以財政困難利用此策以大借外債遂決計行之

〔四川爭路之歷史〕載灃既用宣懷策遂下諭有抗爭者以違制論鄂湘川粵等省人民請暫緩收路均嚴旨申飭川省因路事風潮尤烈載灃命趙爾豐督川以鎮之爾豐素有屠戶名拘保路會代表若干人均民望也紳民環署求釋之爾豐督衛兵槍斃四十餘人以匪徒肇亂報政府川亂益熾濫殺者不可勝計

因令端方帶兵入川厥後爾豐及端方相繼被殺

〔民黨乘機〕先是宣統三年三月民黨內有黃興趙聲等起事於廣州未成而敗烈士之死者甚多然衆情益奮政府以路政干衆怒於是全國人心咸以革命爲公的民黨乘之如矢在機有觸即發

〔八月十九日〕是日爲陽曆十月十日共和成立後因以是日爲國慶日懸旗慶祝名爲雙十節

〔發難武昌〕武昌爲湖北省治當八月初旬鄂督瑞澂得內外各電僉稱民黨伏長江一帶將聚鄂起事瑞澂搜捕甚急迨十九日夜各營兵士咸擊下肩章袖纏白布同聲起義號曰民軍瑞澂聞各營已變先令其親信衛兵護送眷屬暫住兵輪及督署火起棄城而遁武昌遂爲民軍有公推二十一混成協協統黎元洪爲鄂軍政府大都督

〔收復漢口〕漢口當今夏口縣治爲中國腹地第一大商埠租界鱗比八月二十一日夜土匪在漢口華界乘機縱火圖劫掠武昌軍政府遣兵鎮定之因設軍政分府以資進取

〔收復漢陽〕漢陽清爲府、今爲縣、地勢與武昌相犄角、收復漢口之前一日、卽由民軍占領、境內原有兵工廠及鐵廠、遂爲民軍軍火所自出、

〔遠近響應〕全國二十二行省、先後均有義師特起、遙爲響應、

〔清軍攻陷漢口漢陽〕民清兩軍、在漢口地方、屢有戰事、至十月七日、清軍猛攻漢口、陷之、漢陽亦陷、漢口商場、慘罹兵燹、

〔東南各省爲民軍所得〕時江蘇安徽江西浙江福建廣東廣西雲南貴州湖南四川、均由民軍光復、

〔北方諸省亦羣起應和〕陝西於北方、光復爲最早、山西次之、山東河南直隸一帶、均有民軍突起、

〔議和〕漢陽之陷也、隨由漢口領事團介紹、雙方停戰、是時慶內閣已倒、由袁世凱組織內閣、載灃亦辭攝政、罷監國、清廷命袁世凱爲全權大臣、派代表馳赴南方、切實討論、以定大局、世凱隨委唐紹儀爲全權代表、各省軍政府、亦公舉伍廷芳爲議和代表、會議於上海英租界之市政廳、

〔久之議定〕唐伍兩代表、會議多時、清廷擬開臨時國會、公決政體、已而唐代表

因事辭職、所有議和事件、由袁世凱直接電商、計自開議之初、至電商而後、閱時至兩月之久、和議乃定、

〔清帝退位〕清帝以宣統三年十二月二十五日、卽中華民國元年二月十二日、下詔退位、大致言國體一日不決、民生一日不安、今全國人民心理、多傾向共和、南中各省、既倡議於前、北方諸將、亦主張於後、人心所嚮、天命可知、特將統治權公諸全國云云、

〔民軍報以優待之禮三句〕計優待條件共八款、一、以待外國君主之禮、待遇清帝、二、歲撥銀四百萬兩、爲清室經費、三、准居頤和園、侍衛人等照常留用、四、清宗廟陵寢、由民國設兵衛護、五、德宗崇陵及奉安經費、由民國支給、六、以前宮內所用各項執事人員、可照常留用、惟以後不得再招闖人、七、清帝原有私產、由民國保護、八、原有之禁衛軍、歸民國陸軍部編制、額餉仍舊、

第十八 民國統一

本文

民軍起事之時、以武昌爲各省軍政府之中樞、迨清廷議和、各省代表、建議設臨時政府於南京、以十一月十三日、成立、改用陽曆、以是日爲中華民國元

年之元旦，清廷既遜位，移臨時政府於北京，於是南北始統一，合本部滿蒙回藏五大區域之民族，為共和國，民國二年，正式國會成立，遂於十月選舉正式總統焉。我中華民國本部多漢人，苗、瑤、各土司，雜居其間，西北各地，則為滿蒙回藏諸民族所居，同在一國之中，休戚相通，誼屬兄弟，前此為一姓專制時代，各私其種人，故多不平等之制度，今民國建立，凡我民族，不問何種，何教，權利義務，皆屬平等，無所軒輊，利害與共，痛癢相關，同心協力，以肩國家之重任，我中華民國，其庶有彥乎。

準備

- 一 懸中華民國國旗，指語之曰：此為五色旗，表明我國五大民族，公同建國之義，須知五大民族，均屬同胞，對內不為閥牆之爭，乃能對外食和平之福。
- 二 書民國統一四大字於黑板，指語之曰：民軍之起義，及兩方之議和，其對於民國也，均以統一為目的，民國國民之對於民國，亦當以此項目的為目的，乃能收統一之效，汝曹皆民國之一分子也，故與汝曹述統一之歷史。

教授事項

(甲) 時間分配 本課分二時

- 第一時 民軍起事之時，至遂於十月選舉正式大總統焉
- 第二時 我中華民國至其庶有彥乎

(乙) 內容提示

- 一 我國民軍起義之宗旨，純然為改良政治起見，絕無種族上之畛域，不可誤會。
- 二 合五大民族為共和國，則此五大民族，如耳目手足之互相因依，互相保衛，不可有絲毫之離間。
- 三 凡我民族，同心協力，肩國家之重任，中華民國，庶幾有彥，則此種責任之不放棄可知，全國心力之不可不齊一更可知。

參考

〔以武昌為各省軍政府之中樞〕先是民軍既有武昌，因建中華民國鄂軍政府，其後各省義師蜂起，亦各立軍政府，惟是府自為政，不相統一，對內對外，皆蒙絕大之危險，於是公認武昌為中樞。

〔各省代表二句〕時事機益迫，急謀建設統一機關，各省所派遣之代表，齊集武昌，決建臨時政府於南京，隨於十一月十日，由直隸奉天山東河南湖北湖南廣東廣西福建山西陝西雲南四川江蘇浙江安徽江西十七省代表，與孫文爲臨時大總統，餘詳本文。

〔改用陽曆〕古代及前清所用之歷，謂之太陰歷（簡稱陰歷）用太陰（卽月）計算，以十二月爲一年，惟月之繞地，以二十九日半爲一周，十二月實不足一年，故三年置一閏月，五年置兩閏月，以齊之。現時所用之歷，謂之太陽歷（簡稱陽歷）用太陽（卽日）計算，以三百六十五日爲一年，惟地之繞日，以三百六十五日又四分之一爲一周，三百六十五日實不足一年，故每四年置一閏日，以齊之。陽歷較陰歷爲簡便，又東西洋各國所通行，故特行改用。

〔移建臨時政府於北京〕清帝之退位也，孫文辭職，時南京已立有參議院，公舉袁世凱爲臨時大總統，原議至南京就職，嗣以北京有兵變事發生，乃改於北京就職，參議院同時移往焉。

〔五大區域〕本部卽直隸山東山西河南陝西甘肅江蘇安徽江西浙江湖北湖南四川福建廣東廣西雲南貴州十八行省，滿卽奉天吉林黑龍江三行省，蒙卽內外蒙古，其族人間居青海地方，及新疆行省之天山北路，回卽新疆行省之天山南路，其族人間居本部，藏卽前藏後藏。

〔正式國會成立〕國會爲立法機關，以參衆兩議院組織之，二年四月八日，始行開幕禮，前此祇有臨時參議院，非正式之國會，至是正式國會乃成立。

〔選舉正式大總統〕二年十月六日，開正式大總統選舉會於衆議院，袁世凱當選。

〔本部多漢人〕約居人口全數十分之九，有奇，錯居東三省新疆等地者亦甚衆。

〔苗獠各土司二句〕苗爲中國最初之土人（見第一冊第一課）獠爲苗族中之一支，苗獠各土司，其受地遠自周漢，近在唐宋，而元明之土府土州縣，亦錯出其間，雲貴兩廣四川湖南均有之，自清世宗高宗時，漸次改土歸流，湖南及廣東，已無土司，其有土司者，惟雲貴川桂四省之山地而已，其族自古以來，多與漢族同化，故五大民族不列苗獠者，實視苗獠與漢人無異也。

〔西北各地〕西指新疆青海西藏，北指內外蒙古及東三省。

